

## **NIWAKATE HEBREUTEDI**

Agica ane yowoogodi ane lidie nagadi niwakate hebreutedi, idoka oyowoogodi me judeu nigica ane idi. Oditibige me Paulo, ogoa domige Apolo ane idi. Moidi odidikotibige judeutedi anonakato Goniotagodi me dogoika monakato Goniotagodi Jesus, oditaga opitacelogo lakataga laamipi. Yelogoditiogi hebreutedi Jesus me nigijaaajioa Nigicoa ane niige Aneotedogoji me Gonewikatitogodi, codaa yelogodi nigina oko me dagadiaa yakadi me igenagatibigiwaji lodoe Aneotedogoji daga leegodi moyotete liigenatakanegeco Aneotedogoji ane iditedini Moises, codaa nigina modioteci lakataga judeutedi ane dagadiaagica ane jaogate. Moidi oyalaagata nigijo jotigide lakatigi judeutedi sacerdotitedi maleegonigodi eijedi anoibootalo Aneotedogoji mowotibige Aneotedogoji me dagalee iloikatidi oko leegodi libeyacegeco. Eledi yalaagata Jesus me gonisacerdoti gonegegi, codaa me nadoogodi lawodi meotedibige Aneotedogoji me dibatacedogogi. Lawodi Jesus godiwilegitema inoatawece ane gobeyacegeco. Ikee nigida gela anejinaga me idinilakidenagatege Aneotedogoji me dagaxa mele, aliciagi nigijo oxiiigodi domaga gonimawenegegi me idinilakidenagatege Aneotedogoji. Yalaagatiogi nigijo laamipi judeutedi Aneotedogoji ane yakadi me igenagatibigiwaji leegodi monakato, idaaagida me nawikodeega.

Nigidiaagidi eo loniciwaga nigina anonakato Goniotagodi moyowo anodaageeteda Jesus me

dinatiteta ijoatawece lawikodico, odaa leeditibige midagaḡae modinatitalo lawikodico leeḡodi modiatece Cristo. Codaa maḡaḡa onalaḡatibige niḡica noḡeedi anicota me yajigotediogi Aneotedoḡoji, niḡica ane daga daa. Noḡowidijedi lotaḡa jeḡeote ladeenagaḡeḡeco.

*Aneotedoḡoji ibake Lionigi me dinikeetedoḡowa*

<sup>1</sup> Niḡijo jotigide Aneotedoḡoji eliodi me notaḡaneḡetedi ḡodoiḡi, codaa owidi anigotediogi me notaḡaneḡetedi niwace jotigide ḡodaamipi. Imonyatediogi niḡijo anoyeloḡoditedibece Aneotedoḡoji lowooko moditece ane yemaa. <sup>2</sup> Pida natigide, niḡinoa owidijedi nokododi, Aneotedoḡoji ibake Lionigi me yeloḡodi niḡica ane yemaa. Aneotedoḡoji ibake Lionigi meote inoatawece aninoa ditibigimedi, codaa aninoa digoina iḡo, odaa ja iolatedice Lionigi me yajigoteta inoatawece mepoka nepiliditeda. <sup>3</sup> Lionigi datale digo mijoataḡa Aneotedoḡoji me datale, codaa liciagi Aneotedoḡoji. Ibake lotaḡa loniciweḡenaga me doweditedeloco codaa me ika midioka limedi minoa inoatawece niḡinoa ane jinataḡa. Niḡidiaaḡidi neḡeote nimaweneḡegi me napitaḡadi inoatawece ḡobeyaceḡeco, odaa ja nicotedini digoida ditibigimedi nimedi ḡoneḡegi liwai libaḡadi Aneotedoḡoji ane iḡe inoatawece. <sup>4</sup> Odaa jeḡeote me daḡaxa me ḡoneḡegi naḡaxatedeloco aanjotedi, digo anee Liboonagaḡadi ane yajigote Aneotedoḡoji me daḡaxa me ḡoneḡegi, aḡica liciagi. Aneotedoḡoji yajigote Liboonagaḡadi me “Lionigi”.

*Lotaganaḡaxi Aneotedoḡoji ikee Lionigi  
Aneotedoḡoji me daḡaxa me ḡoneḡegi caticedi  
aanjotedi*

<sup>5</sup> Lionigi daḡaxa me ḡoneḡegi, igaataga  
Aneotedoḡoji aḡica otigidatece daḡa eeteta  
okanicodaagacata aanjo niḡijoa lotaga aneeteta  
Lionigi, niḡijo meeteta,  
“Akamokakaamita makaami Ionigi,  
amina noko ja jaote me Ee Gadiodi.”  
Eledi meeteta,  
“Jeḡee Gadiodi,  
codaa akaami Ionigi.”

<sup>6</sup> Niḡina Aneotedoḡoji me nadeegite Lionigi ane  
daḡaxa me ḡoneḡegi niḡina iḡo, eledi mee,  
“Akaamitawecetiwaji anakaami niaanjotedi  
Aneotedoḡoji  
oḡeetetalo Ionigi!”

<sup>7</sup> Niḡijo Aneotedoḡoji me yalaḡate aanjotedi, mee,  
“Jaote iniaanjotedi micataḡa daḡa niwocotadi,  
codaa niḡidiwa iniaanjotedi ane iotaka dinoe  
micataḡa daḡa ḡalewaga.”

<sup>8</sup> Pida niḡina Aneotedoḡoji naḡaga yalaḡate Li-  
onigi, mee,  
“Inoenogodi,  
idioka limedi makaami ane diiḡenataka.  
Niḡina me iḡeni niḡina oko,  
awii ḡanimaweneḡegi ane iḡenaga me  
iḡenatakani.

<sup>9</sup> Emaani niḡina ane iḡenaga,  
codaa ḡadeleḡedi niḡina ane beyagi.  
Joaniḡidaa leegodi Ee,  
Ganoenogodi Aneotedoḡoji,  
me ḡadiolaatice,

codaa me ɣadiweniɣideni caticedi niɣijoa  
 ɣadokaagetedipi,  
 codaa jiɣidaa me jao meliodi me aniniitibeci.”

<sup>10</sup> Aneotedoɣoji eledi yalaɣate Lionigi, niɣijo  
 negee,

“Goniotagodi,  
 niɣijo jotigide aniɣicatibige daɣa jinataɣa  
 inoatawece aninoa,

jaɣakamaɣakaami ane oeni iiɣo,  
 codaa abakeni ɣabaagatedi me oeni ditibigimedi.

<sup>11</sup> Odaa ditibigimedi inaa iiɣo icota me ma,  
 pida akaami biɣidioka limedi makaami.

Ditibigimedi inaa iiɣo icota me laxokodi  
 micataɣa nowoodaɣagi moxiigodi.

<sup>12</sup> Ateciɣitiwage macataɣa wetaɣajo,  
 codaa me iikoegeni

micataɣa niɣina me jiikoenaga nowoodaɣagi  
 oxiiigodi.

Pida akaami biɣidioka limedi makaami,  
 adiniigi aneni,  
 codaa aɣakaami oxiiigodi.”

<sup>13</sup> Aneotedoɣoji aɣica deɣeeteta anigetigiijo aanjo  
 ane ligegiteta Lionigi, niɣijo mee,

“Anicooti digoina iwai ibaagadi  
 nigepaaɣicota me jiiɣeke ɣaneloɣododipi.”

<sup>14</sup> Inoatawece aanjotedi niwicidi anodibatema  
 Aneotedoɣoji, ane iiɣe moyaxawa niɣina oko  
 aneote me newiɣatace.

## 2

*Leeditibige me jatacoloɣojogotece lotaɣa  
 Aneotedoɣoji*

<sup>1</sup> Aneotedoꝑoji ibake Lionigi me ɣodotaɣaneɣe, oɗaa leeditibige me jatacoloꝑojoɣotece lotaɣa anewi ane jajipaagatalo, amanagawini aɣejamaɣajoɣotice. <sup>2</sup> Niɣijo nibodigi aanjotedi anodita Moisés ewi, codaa niɣijo aneote Aneotedoꝑoji iɣenaga niɣina me iloikatidi niɣijo oko leegotedi ijoatawece ane beyagi anowote, niɣijo midatibece me doɣoyiwaɣaditeda liigenatakanegeco Aneotedoꝑoji. <sup>3</sup> Enice nige deɣejiwaɣataɣateda lotaɣa ɣoneɣaga anonikeetoɣowa anodaagee Aneotedoꝑoji meote ɣodewiɣa, oɗaa aɣodiwoko niɣina nige limedi me iloikatidi oko leegodi libeyaceɣeco. Goniotaɣodi Jesus jiɣijaa odoejegi ane nikeetedoɣowa anodaagee Aneotedoꝑoji meote ɣodewiɣa. Oɗaa niɣidiaaɣidi niɣijo anowajipatalo joɣonatematitedoɣowa lotaɣa. <sup>4</sup> Aneotedoꝑoji ikee niɣinoa lotaɣa Lionigi mewi niɣina meote ɣobinico anoikee anicota me loenatagi Aneotedoꝑoji, inoa ɣodoxiceɣetedi, codaa me icilatidi owidi eelotaginadi, codaa niɣina me yajigotediogi oko lixaketedi anepaa yemaa me yajigotediogi, ane najigotedoɣowa Liwigo Aneotedoꝑoji.

### *Jesus jiɣijaageote ɣodewiɣa*

<sup>5</sup> Ejinagatece niɣicoa nokododi nige dopitedijo Aneotedoꝑoji Lionigi me diigenataka digoina iiɣo. Aneotedoꝑoji ayajigotediogi aanjotedi loniciwaɣa moiiɣe niɣica gela iiɣo aneote anigida noko. <sup>6</sup> Maditaɣa lotaɣanaɣaxi Aneotedoꝑoji, iwoteloco Davi ane ligegitalo Aneotedoꝑoji, niɣijo mee, “Inoenogodi,

igaamee ina mowoo ina oko,  
 ane liotedawaana,  
 ane digicata jaogate?  
 Igaamee ina madowetiteloco ina oko ane digica  
 loniciwaga?

<sup>7</sup> Niɣijoa nokododawaanaɣa adianite Goneleegiwa  
 ane icoɣotibigimece ditibigimedi,  
 natinedi aanjotedi.

Pida natigide,  
 jaɣaweniɣideni  
 codaa jaɣajicitalo eliodi loniciwaga.

<sup>8</sup> Codaa jaɣajicitalo loniciwaga  
 codaa me naɣatetigi me iige inoatawece aninoa.”  
 Niɣijo Aneotedoɣoji naga yajigote loniciwaga  
 me iigete inoatawece, odaa aɣica idi ane daga  
 yajigote niɣijoa Goneleegiwa ane icoɣotibigimece  
 ditibigimedi me iige. Pida natigide jinataɣa  
 aɣinatawece oko oyiwaɣadi. <sup>9</sup> Pida ijoa  
 me jinataɣa Jesus. Onateciɣijoa nokododi  
 Aneotedoɣoji ideyate Jesus natinedi aanjotedi,  
 eotedibige me yeleotetema inatawece oko meote  
 lewiɣa, leegodi Aneotedoɣoji me iwikode niɣina  
 oko. Joaniɣidaa leegodi Aneotedoɣoji naga  
 iweniɣide codaa me yajigote eliodi loniciwaga.

<sup>10</sup> Aneotedoɣoji eote inoatawece aninoa  
 codaa doweditedeloco inoatawece, codaa  
 inoatawece nepilidi. Aneotedoɣoji nadeegite  
 miniwataɣa eliodi oko meote me lionigipi, codaa  
 me iweniɣide. Enice joaniɣidaa mewi, niɣijo  
 meote lewiɣa oko, ika Jesus, me dawikode, odaa  
 joaniɣidaa naga igodi libakedi. Jesus jiɣijaageote  
 ɣodewiɣa, joaniɣidaa ane libakedi. <sup>11</sup> Jesus  
 iwilegitetema oko libeyacegeco. Odaa inatawece

ane yapiditibigiwaji, codaa jiginiagaaniwa ane godapitaqadi, oada Eliodi, iniaaganiwa Godiodi. Joanigidaa leegodi Jesus aniboligatedogodici meetedogowa moko nioxoadipi. <sup>12</sup> Maditaga notaganagaxi enaco, meete,

“Inoenogodi, ejitaqadici miditaga inioxoadipi. Jogetetaqawa liwigotigi qadoiigi nigina me yatecogo.”

<sup>13</sup> Codaa eledi mee, “Emegeeta jagatalo Aneotedogoji.”

Eledi mee, “Ite Ee minataga nigina oko ane najigotediwa Aneotedogoji, ane micataga daga lionigipi.”

<sup>14</sup> Nigina oko aneete Jesus me lionigipi Aneotedogoji, Aneotedogoji eote lawodi codaa me libole. Joanigidaa leegodi nigijo Jesus naga enitedini malee nigaanigawaanigi, Aneotedogoji yajigote lolaadi, lawodi codaa me liboledi. Eote lolaadi me liciagi godolaadi. Oada jigidaagee menitedini liciagi okanicodaagica oko, eotedibige me yakadi me yeleo, oada ja inoke loniciwaga diaabo ane domigijo mida loniciwagateloce némaqa. <sup>15</sup> Eleditace eotedibige me ikatedicoace nigina oko ane micataga daga niwilogojedipi leegodi modoitigi némaqa inoatawece nokododi.

<sup>16</sup> Ewi Jesus me daga enagiteda me yaxawateda aanjotedi. Pida enagi me yaxawa nigina oko anida aneetege licoqegi Abraão. <sup>17</sup> Joanigidaa me leeditibige Jesus me diniciaceeketedogogi, me digicata ane diniwokotedogodici. Eote me godiciaceekawa, eotedibige me qonisacerdoti

gonegegi ane godiwikode codaa midioka limedi meote libakedi anele. Eleditace eotedibige me yakadi me yeleotetema gobeyacegeco, eotedibige Aneotedoꝑoji me daꝑadiaaꝑoko laagetedipi. <sup>18</sup> Dawikode niꝑijo me dineetalo ꝑodaxakawa, joaniꝑidaa leeꝑodi miniaaꝑiniwa yakadi me yaxawa niꝑina ane dineeta ꝑodaxakawa.

### 3

#### *Jesus iniaa Moisés*

<sup>1</sup> Inioxadipi, Aneotedoꝑoji ꝑadiolaatedicoace makaami nepilidi, codaa eniditedaꝑawa midioka limedi me ideoni miniwataꝑa, oada ina bogowoo Jesus, Niꝑijoa liꝑexegi Aneotedoꝑoji, jiꝑiniaa ꝑonisacerdoti ane daꝑaxa me gonegegi, okotawece ane jinakatonaga. <sup>2</sup> Aneotedoꝑoji iolatedice meote niꝑida libakedi me ꝑonisacerdoti gonegegi, oada idioka limedi meote inoatawece Aneotedoꝑoji ane iꝑete meote, digo mijotaꝑa Moisés midioka limedi meo ijoatawece niꝑijoa Aneotedoꝑoji ane iꝑete meote me libaketedi liwigotigi Aneotedoꝑoji loiigi. <sup>3</sup> Niꝑina oko ane dabiteꝑetini diimigi daꝑaxa moiweniꝑide catedi niꝑini diimigi loenatagi. Jiꝑidaaꝑee Jesus leeditibige moiweniꝑide catedi Moisés, leeꝑodi liciagi niꝑijo ane dabiteꝑetini diimigi. <sup>4</sup> Natigide okanicodaaꝑica diimigi ini noenatagodi, pida Niꝑijoa ane yoe inoatawece baꝑa Aneotedoꝑoji. <sup>5</sup> Moisés idioka limedi mele me diba liwigotigi loiigi Aneotedoꝑoji, micataꝑa daꝑa niotagi ane dibatigi diimigi. Ikee niꝑica Aneotedoꝑoji ane yatemati nigidiaaꝑidi. <sup>6</sup> Pida Cristo baꝑa daꝑaxa



me gonegegi catedi okanicodaagica niotagi. Igaataga eote ijoatawece nigijoa Aneotedogoji ane iigete meote, micataga nigina nionigi ane dowediteloco diimigi. Oko бага godiciagi nigini diimigi, nigidioka limedi mabo godaalegena, codaa nigidioka limedi me jinakatonaga mida gonagajegi ane inibeonagatege.

*Gonajoinegegi me daga jakakagataga godaalegena*

<sup>7</sup> Odaa digawini ane ligegi Liwigo Aneotedogoji, mee,

“Nige ajipaatiwaji ligegi Aneotedogoji nigina noko,

<sup>8</sup> jinaga akakagati gadaalegenali, digo mijotaga anee jotigide gadaamipi miditaga nipodigi ane yadilo ane digicata nigeladimigipi,

no godakapetege Aneotedogoji, codaa modineetaloo.”

<sup>9</sup> “Odaa mee Aneotedogoji,

‘Digoida miditaga nigijo nipodigi ane yadilo, jotigide gadaamipi odineetiwa, idaagee monadi libinico ane jaote nigijoatigilo cwareenta nicaagape.

<sup>10</sup> Joanigidaa leegodi me idelatema nigijo noiigi, odaa meji,

“Idi anidioka limedi meyamagaticoace inaigi codaa agoyemaa moyiwagadi iigenatakanegeco.”

<sup>11</sup> Odaa naga idelatema

odaa ja jao igegitiogi meji,

“Nigidi agica ane yakadi micota nigidi nipenagadi ane jilakidetema yoiigi.” ’ ’ ”

<sup>12</sup> Inioxoadipi, adowetita adigica nigina akaamitiwaji ane abeyacege laalegena aneo

me daḡa nakatoteda Goniotagodi, codaa niḡida niciagi ḡadadeegiticogi ditigedi motonitedice Aneotedoḡoji, Niḡijoa ewikegi. <sup>13</sup> Pida akamaḡakaami adinoniciwaḡatitiwage inoatawece nokododi maleeḡakati majipaata ligegi Aneotedoḡoji, amanagawini aḡicoa niḡina akaamitiwaji ane dakake laaleḡena, leeḡodi libeyaceḡeco ane inaale. <sup>14</sup> Iḡaataḡa oko lokaḡetedipi Cristo nige idokee me jinakatonaga nigepaa ḡodiniogo, digo mijotaḡa me jinakatonaga maleekoka joleeḡatibige me jinakatonaga.

<sup>15</sup> Iḡaataḡa mee lotaḡa Aneotedoḡoji, “Niḡajipaata ligegi Aneotedoḡoji niḡina noko, jinagaḡakakaḡati ḡadaaleḡenali, mijotaḡa anee jotigide ḡadaamipi noḡodakapeteḡe Aneotedoḡoji, codaa modineetalo.”

<sup>16</sup> Amiidi ica anowajipatalo Aneotedoḡoji odaa niḡidiaaḡidi ja nakapeteḡi? Ijotawece niḡijo oko ane noḡaticoace Moisés me ideitice Egipto. <sup>17</sup> Amiidi ica Aneotedoḡoji ane yelatetema icotigilo cwareenta nicaaḡape? Yelatetema niḡijo anowote loenataka ane beyagi odaa ja nigo miditaḡa nipodigi ane yadilo ane diḡicata nigeladimigipi. <sup>18</sup> Niḡijo Aneotedoḡoji neḡeote ligegitediogi ica noiigi me doḡoyakadi motota ane yoetetema me nipenaḡadi loiigi, amiidi ica aneetediogi Aneotedoḡoji? Eetetece Aneotedoḡoji niḡijo ane doḡoyiwaḡaditeda. <sup>19</sup> Odaa ja jinataḡa aḡoyakadi motota niḡica nipodigi Aneotedoḡoji ane yemaa me yajigotediogi loiigi, leeḡodi me doḡonakatoteda.

## 4

*Ica nipenaḡadi loiigi Aneotedoḡoji*

<sup>1</sup> Aneotedoḡoji eote ligegitedoḡogi me jakataḡa me jakaḡatiwece codaa me inipenaḡatini miniwataḡa digoida ditibigimedi. Enice ele me idinowetaga adigica niḡina akaamitiwaji aneyamaḡatice, oditaga aḡalee yakadi me iwida niḡica ḡonipenaḡadi. <sup>2</sup> Igaataga okoeledi jajipaḡatalo nibodicetedi anele ane icoḡotedibigimece miniwataḡa Aneotedoḡoji, digo mijotaḡa ḡodaamipi mowajipatalo. Owajipatalo lotaga Aneotedoḡoji, pida niḡijo mowajipatalo aḡica anoniboloiteetece leeḡodi aḡoyiwagaḡadi. <sup>3</sup> Igaataga niḡida moko baanaḡa jinakatonaga Goniotagaḡodi, baḡa jakaḡatio miditaga ḡonipenaḡadi. Pida beḡeetediogi Aneotedoḡoji ḡodaamipi,

“Idelatema niḡijo oko

odaa ja jao igegitiogi me digicata ane nakatiobece odaa anipenaḡa digoina meetaga”.

Aneotedoḡoji eote niḡida ligegi leeḡodi me dakapeteteḡe jotigide ḡodaamipi idaḡaḡee naḡa igodi inoatawece me ilakidetedi nipenaḡadi.

<sup>4</sup> Digawini anodaḡaḡee Aneotedoḡoji me yalagata niḡica noko ḡonipeneḡegi maditaga lotagaḡanaḡaxi, mee, “Aneotedoḡoji yadeegi dibatio ḡobaḡaḡadi nokododi meote inoatawece ane loenataka, odaa neḡeledi noko jaḡanipetedini.”

<sup>5</sup> Odaa ja yalagatace niḡica noko, niḡijo mee, “Aḡoyakadi me nakatiobece oditaga nipenaḡa meetaga.” <sup>6</sup> Niḡijo odoeḡedipi oko anowajipatalo nibodicetedi ane icoḡotedibigimece miniwataḡa

Aneotedoꝓoji adakatiobece miditaga ica domaꝓa nipenaꝓadi ane yoetetema Aneotedoꝓoji, leegoꝓi aꝓoyiwaꝓadi lotaga. Pida ina eledi oko aneꝓaꝓa dakatiobece miditaga niꝓica nipenaꝓadi. <sup>7</sup> Igaataꝓa Aneotedoꝓoji ja iolatedice eledi noko anidokeyatedigi me “Niꝓina noko”. Niꝓiꝓo jotigide ꝓodaamipi oyotigimade Aneotedoꝓoji. Odaa naꝓa ixomaꝓatediꝓo owidi nicaaꝓaꝓe, Aneotedoꝓoji ja iige Davi meetece niꝓiꝓoa notaga baanaga ejiꝓaꝓatece,

“Niꝓaꝓiꝓaata ligegi Aneotedoꝓoji niꝓina noko, jinaga akakaꝓati ꝓadaaleꝓenali!”

<sup>8</sup> Josué daantaꝓa yaꝓeeꝓi niꝓiꝓo noiigi miditaga niꝓica nipenaꝓadi anejiꝓaꝓatece, daꝓanaꝓawini Aneotedoꝓoji aꝓeetetece niꝓidiaaꝓidi niꝓica eledi noko aneyatedigi me “Niꝓina noko”. <sup>9</sup> Odaa jiꝓidaaꝓee eꝓidita ica nipenaꝓadi Aneotedoꝓoji loiigi, digo miꝓoataꝓa Aneotedoꝓoji manipetedini naꝓa saabado naꝓa igodi inoatawece ane loenataka. <sup>10</sup> Igaataꝓa niꝓiꝓo ane dakatio manipetini miniwataꝓa Aneotedoꝓoji digoida ditibigimedi, niꝓini oko ja ika inoatawece libaketedi, digo miꝓoataꝓa Aneotedoꝓoji manipetedini odaa ja ika libakedi. <sup>11</sup> Enice ele me idinoniciwaꝓataꝓa me jakakaꝓatio, me inipenaꝓatini miniwataꝓa Aneotedoꝓoji, amaleeꝓaꝓa aꝓica oko ane yotigimade Aneotedoꝓoji miꝓotaꝓa jotigide ꝓodaamipi moyotigimade, odaa aꝓaleeꝓoyakadi me dakatiobece aneite Aneotedoꝓoji.

<sup>12</sup> Igaataꝓa niꝓinoa notaga ane iwoteloco Aneotedoꝓoji lotaꝓanaꝓaxi liciagi niꝓina ane yewiꝓa codaa mida loniciwaꝓa. Yakadi me

dakatedio catedi me liciagi nodaajo-ocagataga ane dalepe idoatawece liwailidi. Igaataga niġinoa notaġa yakadi me yakagidi codaa me yawalacetiwage ġodowooko codaa me ġodiwigo, liciagi niġijo nodaajo me yakadi me iomaġaditege libitagi, libole. Niġinoa lotaġa Aneotedoġoji oiġee domige beyagi, oġoa, domigele niġinoa ane ġodemaanaġa, inoa ġodowooko catiwedi ġodaaleġena. <sup>13</sup> Aġica ane jakataġa me jaġataġatema Aneotedoġoji. Inoatawece ane loenataka yeloġotelogo, inoatawece naditedeloco. Codaa leeditibige me idinigeegatalo, inoatawece ane ġodoenataka.

### *Jesus ġonisacerdoti ġoneġegi anele*

<sup>14</sup> Enice ele me jatitaġateloġo ġotiwagatakaneeġi, iġaataġa iniwa ġonisacerdoti ġoneġegi aneletedoġodomi, ane dakatediwece digoida ditibigimedi, lodoe Aneotedoġoji. Jesus jiġiniaa ġonisacerdoti, Lionigi Aneotedoġoji. <sup>15</sup> Niġiniwa ġonisacerdoti ġoneġegi yakadi me ġodiwikode niġina me ġodaġamalaga, codaa niġina me jawikodeeġa, iġaataġa Iniaaġiniwa odineetalo inoatawece anodigotalo, codaa me dawikode digo mokotaġa, pida baadeġeote ane beyagi. <sup>16</sup> Enice iniga lodoe Aneotedoġoji anidioka limedi meliodi meletedoġodomi, jiġigatalo me daġa idoiġigatalo amaleeġaġa ġodiwikode Aneotedoġoji, codaa amaleeġaġa eliodi meletedoġodomi, codaa me ġodaxawatetece niġinoa ġodaġalanaġa.

## 5

<sup>1</sup> Ijoatawece niġijoa ġoneleegiwadi ane

ijo me lacilodi-sacerdotitedi oiolaticoace liwigotigi eletidi goneleegiwadi, oixipeticoace modibatema Aneotedoḡoji moyaxawa eledi oko. Oyadeegitalo Aneotedoḡoji liboonaga niḡijo oko, codaa me niḡijoa eijedi anonigodi owotibige Aneotedoḡoji me ixomagateetedice niḡijoa libeyaceḡeco anowote niḡijo oko. <sup>2</sup> Oyakadi moiwikode niḡijo oko niḡina mowote libatico ane doḡoyowoḡoditeda me beyagi, codaa niḡijo oko anoninaaletiniwace, oada jeḡeyamaḡaticoace, igaataga iniaagini idatecibece me naḡamalaga, codaa me dibatá. <sup>3</sup> Leegodi maḡaḡa dibatá, oada leeditibige maḡaḡa nigodi eijedi aḡijoka leegotedi niḡijo oko libeyaceḡeco, pida eledi leegodi aagaḡa libeyaceḡeco. <sup>4</sup> Aḡica ane yakadi mepaa diniweniḡide codaa aḡica ane yakadi deḡepaa diniomaḡaditice me lacilo-sacerdotitedi niḡijo jotigide, pida ijokijo niḡijo Aneotedoḡoji ane iolatedice, codaa anenidite me niḡiniaa lacilo-sacerdotitedi, digo mijotaḡa niḡijo jotigide Aneotedoḡoji neḡenidite Arão me niḡijaa lacilo-sacerdotitedi.

<sup>5</sup> Joaniḡidaa Cristo me daḡa diniweniḡideteda, codaa me deḡepaa dinixipetedice me niḡiniaa lacilo-sacerdotitedi. Pida Aneotedoḡoji epaa iweniḡide, niḡijo neḡeeteta,  
 “Akaami Ionigi.

Niḡina noko jao me Ee Gadiodi.”

<sup>6</sup> Miditaḡa eledi liwai lotaḡanaḡaxi Aneotedoḡoji, mee Aneotedoḡoji,  
 “Idioka limedi makaami sacerdoti,  
 ḡadiciagi mijotaḡa Melquisedeque,  
 niḡijo jotigide.”

7 Niḡijo Jesus maleeḡinaaḡite digoina iigo, yotaḡaneḡetedibece Aneotedoḡoji, dipokote. Igedi me dotaga codaa datiidi me dipokote Aneotedoḡoji me noḡatedice lawikodigi niḡidaaḡoyatedigi moyametibigo neḡepaa yeleo. Odaa Aneotedoḡoji wajipate Jesus ane lipoketegi leeḡodi me yemaa meote icokica niḡica ane yemaa Aneotedoḡoji. 8 Idaaḡida me Lionigi Aneotedoḡoji, pida niḡijo Jesus naḡa dawikode, odaa ja yowoḡodi me leeditibige midioka limedi meyiwaḡadi Eliodi leeḡotedi lawikodico. 9 Niḡijo Jesus naḡa ixomaḡateetedijo ijoatawece ane leeditibige me lawikodico, odaa jeḡeote me Gonewikatitoḡodi. Odaa ja yakadi meote midioka limedi me newiḡa inatawece oko anoyiwaḡadi. 10 Odaa Aneotedoḡoji ja yeloḡoditedibece me niḡiniaa iolatedice Jesus me ḡonisacerdoti ḡoneḡegi, digo mijotaḡa Melquisedeque.

*Leeditibige me ḡodili mejiwaḡatakanaḡa odaa aḡejamaḡajogotice*

11 Ja domaḡa eliodi me idalaḡa Melquisedeque, pida dakake me jeloḡoditaḡawatiwaji ane diitigi, leeḡodi jaḡakakaḡati ḡadaaleḡenali, odaa aḡajipaatiwaji. 12 Ja leegi makaamitiwaji manakatonni Goniotagoḡodi, odaa ja domaḡakatitiwaji daḡakaami niḡaxinaḡanadi. Pida niḡida makaamitiwaji eleeditibige mini oko ane ḡadiiḡaxinitacece niḡinoa niḡaxinaḡaneḡeco ane daḡa dakaketeda maditaḡa Aneotedoḡoji lotaḡanaḡaxi. Niḡida makaamitiwaji jiḡide eni mi-cataga niḡina daḡakaamitace nigaanigipawaanigi anoyopotibige waca-lotiidi, analee doḡoyakadi

moyeligo niḡina baanaḡa niweenigi. <sup>13</sup> Niḡina nigaanigawaanigi baḡaleegilibi, ayakadi me yowoogoditece liigaxinaganegeco Aneotedogoji lotaḡa ane ikee anele, codaa ane beyagi, leegodi malee nigaanigawaanigi. <sup>14</sup> Pida niḡidaeledi niweenigi, liweenigi niḡina baanaḡa oko, niḡijo baanogoyowoogodi moiwi niḡina ane iḡenaḡa, inaḡina ane beyagi, odao owo inokina ane iḡenaḡa.

## 6

<sup>1</sup> Enice joleegatibige midapaḡa jiiḡaticogi odoe me idiniiḡaxinaḡa. Jikanaga me jiiḡaxinaganagatece niḡijoa odoe jidi niigaxinaganegeco ane daga dakaketeda anoditece Cristo. Odaa ele me idiniiḡaxinagatacece niigaxinaganegeco ane dakake, amaleegaga ili ḡotiwagatakanegegi. Jinagalee idiniiḡaxinagatacece me leeditibige me idinilaanagatece ḡobeyacegeco anowo oko midioka limedi me yeleo, codaa jinagalee idiniiḡaxinagatacece me leeditibige me jinakatonaga Aneotedogoji. <sup>2</sup> Jinagalee idiniiḡaxinagatacece niigaxinaganegegi aneetece me idinilegenaga, codaa anodaagee judeutedi me diniwilegi, codaa me niigaxinaganegegi aneetece anodaagee Liwigo Aneotedogoji me iḡe oko niḡina me jipekenagateloco ḡobaagatedi. Jinagalee idiniiḡaxinagatacece niigaxinaganegegi aneetece anodaagee Aneotedogoji meote emagaga me newigatace, codaa anodaagee me iwi, odao midioka limedi me iloikatidi niḡina oko abeyacaḡaga. <sup>3</sup> Enice jikanaga inoa



niigaxinaganegeco, odaa idiniigaxinagatece niigaxinaganegeco baḡa dakake, nige ḡodika Aneotedoḡoji me jaḡḡa.

<sup>4</sup> Odaa ele me joleḡatibige midapaga jiiḡaticogi odoe me idiniigaxinaga, igaataga niḡijo aneyamaḡatice eliwaḡatakanegegi, codaa ane daḡalee yemaa me diotece Goniotaḡodi, aḡaleegica nimaweneḡegi me dinilaatace. Ja yowoḡodi nilokokena Aneotedoḡoji, codaa ja ici niḡijo noḡeedi Aneotedoḡoji ane yajigoteta, codaa jiiḡijo me deemitece loniciwaga Liwigo Aneotedoḡoji catiwedi laaleḡena. <sup>5-6</sup> Jiiḡijo me ici lotaga Aneotedoḡoji, odaa ja yowoḡodi mele, codaa jiiḡijo me ici niḡinoa lixaketedi anele ane yajigota Aneotedoḡoji Liwigo, nigeyamaḡatice odaa aḡalee yemaa me diotece Goniotaḡodi, aḡaleegica ḡonimaweneḡegi daḡa jaḡḡa me dinilaatacece libeyaceḡeco, igaataga niḡida anee micataḡa daḡa yototacedini Lionigi Aneotedoḡoji, odaa ja yametibigimece lodoeeledi oko.

<sup>7</sup> Niḡina oko liciaceekawa iḡo. Igaataga niḡina ebici midatibece menitinigi iḡo, odaa iḡo jiiḡinoa ane nokoloḡoteloco nawodigijedi anele, ane yemaa nawodaḡanaga, odaa Aneotedoḡoji ibinie niḡidi iḡo. <sup>8</sup> Pida niḡina iḡo minoka yajigoteda lalepigiḡoli inaa lewaga ane diḡicata aneletema, doidetibige Aneotedoḡoji me ixoo niḡidi iḡo, codaa me yalegi.

<sup>9</sup> Pida idaaḡidata mejinaga niḡijoa ḡodotaḡa, yokaaḡetedipi yemaanigipi, aḡejiwaḡatakanaga daḡamiḡiticoace, pida ejiwaḡataḡa midioka limedi me ikeeni anodaḡeni me ḡadewiki Aneotedoḡoji

meote gela gadewiḡa. <sup>10</sup> Aneotedoḡoji iḡenaga, codaa ayaagiditedibige niḡijo ḡabakedi anawiitiwaji, codaa me ḡademaanaga neḡegitalo anikeenitiwaji niḡijo maxawani codaa niḡina natigide maxawani ḡanioxo adipi, domoḡonoga libeyaceḡeco. <sup>11</sup> Eliodi me jemaanaga moninotecibeci niḡina akaamitiwaji midioka limedi madinoniciwagaḡatitiwaji nigepaaḡicota niḡica owidijegi noko, amaleeḡaga abaatege niḡica ḡanaḡajegitiwaji ane nibeotaḡagi. <sup>12</sup> Ajemaanaga daḡakaamitiwaji abaciḡegipi, pida iwitece anodaḡee niḡina aneniwagaḡakanaga, codaa odinatitalo inoatawece, amanagawini abaatege niḡica Aneotedoḡoji anee me yajigotedaḡawatiwaji.

*Niḡina Aneotedoḡoji ane ligegi, idioka limedi meote*

<sup>13</sup> Niḡijo jotigide Aneotedoḡoji eote ligegitetege Abraão. Niḡijo neḡeote ligegitetege, Aneotedoḡoji ibake epaa Liboonagaḡadi, igaḡaga aḡicaeledi boonagaḡadi ane daḡaxa me ḡoneḡegi. <sup>14</sup> Niḡijo Aneotedoḡoji neḡeote ligegitetege Abraão, meeteta, “Jao igegitaḡagi jaotaḡadomi niḡina anele, codaa jaotaḡadomi mowidi ḡadionigipi, ḡadawaḡa.” <sup>15</sup> Abraão abotege me dinatita me nibeotege niḡijo ane ligegiteta Aneotedoḡoji, joaniḡidaa leeḡodi me dibatege niḡijo aneeteta Aneotedoḡoji me yajigote. <sup>16</sup> Niḡina oko mowo ligegi, oibakeeledi oko liboonagaḡadi ane daḡaxa me ḡoneḡegi moikee mewi mowo niḡida ane ligegi. Odaa niḡina mowo nigegitegeeledi oko, odaa ja yaagaḡadi okanicodaḡica

notigimadigi. <sup>17</sup> Aneotedoḡoji yemaa meote me yenikamaḡa moyowoḡodi niḡina oko niḡica aneote ligegiteteḡe. Yemaa me ikee me daḡa anojicetetema ane ligegi. Joaniḡidaa leeḡodi me ibake epaa Liboonḡadi niḡina meote niḡijo ligegiteteḡe Abraão. <sup>18</sup> Joaniḡidaaḡee idoa itoataale ane daḡa yakadita me diniigi: Jiḡiniaa Aneotedoḡoji aneote ligegi, codaa jiḡiniaaḡiniwa ane ibake epaa Liboonḡadi. Odaa joaniḡidaaḡee Aneotedoḡoji ayakadi daḡa ḡodinaale. Codaa joaniḡidaa leeḡodi me jotetaḡatini, okomodi baanaḡa jelaḡatalo Aneotedoḡoji me ḡodotete, codaa jakataḡa mabo ḡodaaleḡena me inibeonḡateḡe ḡonaḡajegi anicota me najḡotedoḡowa. <sup>19</sup> Niḡina me inibeonḡateḡe niḡica ḡonaḡajegi, ele me joleeḡatibige me jotetaḡateloḡo ḡotiwagaḡakaneeḡegi, odaa aḡejamaḡajoḡotice daḡa jonaḡatedice Aneotedoḡoji. Niḡina me jotetaḡateloḡo ḡotiwagaḡakaneeḡegi, ḡotiwagaḡakaneeḡegi liciagi niḡina ḡapileceḡe anoyate catinedi ninyoḡodi ane daḡa ika niwatece me yadeegi ninyoḡodi, igaataḡa dotetetini. Inibeonḡateḡe Niḡijoa ane dakatediwece digoida lodoe Aneotedoḡoji, micataḡa niḡijo lacilo-sacerdotitedi me dakatiobece Aneotedoḡoji ligeladi, ixomaḡatice caticedi naḡajo lipeḡeteḡe epoacajo, odaa ja dakatiwece digoida lodoe Aneotedoḡoji. <sup>20</sup> Jesus jiḡijaa odoeḡegi me dakatediwece lodoe Aneotedoḡoji digoida ditibigimedi me ḡodeleḡete. Jiḡijaḡijoa anidioka limedi me sacerdoti ḡoneḡegi, liciaceekawa mijotaḡa sacerdoti Melquisedeque.

## 7

*Melquisedeque, sacerdoti codaa me inionigieliodi*

<sup>1</sup> Nigica jotigide ica Melquisedeque ninionigieliodi aca nigotağa ane liboonagađi Salém, codaa me sacerdoti ane dibatema Aneotedođoji ane iige inoatawece. Nigica Abraão nağa dopitice me diwitide nigica nağa nigodi icoa ciinco inionağa-eloodoli anoidelege, ođaa Melquisedeque jigigo dakapetege, ođaa ja ibinie. <sup>2</sup> Ođaa Abraão ja yajigota Melquisedeque nidiizimo icoatawece nigicoa lateka ane nepilidi nigijoa inionağa-eloodoli. Ica liboonagađi Melquisedeque one amina anejinağata “Inionigieliodi ane igenağa”, iniaagini ninionigieliodi aca Salém, amina anejinağa “Inionigieliodi aneote mele godaalegenali”. <sup>3</sup> Codaa ađica ane yowođodi nigica eliodi oteğexaagağa aca eliodo, oteğexaagağa ica nelokododipi. Ađica ane yowođodi ica negenitini, codaa ica nağa yeleo. Ođaa ja liciagi Aneotedođoji Lionigi, igaataga ijaađijo idioka limedi me sacerdoti.

<sup>4</sup> Digowootiwaji Melquisedeque me dağaxa me gonegegi! Abraão aneliodi inatawece godoiigi pida yajigota Melquisedeque nidiizimo nigicoa lateka me diwitide. <sup>5</sup> Nigijo anida aneetege licođegi Levi, nigijo lionigi Jacó, ane libatadegegi me sacerdotitedi. Nigijoa lajoinağanegeco Moisés iige nigidiwa sacerdotitedi modibatege nidiizimo nigidi noiigi, inoatawece ane nepilidi, idaagee nigidi noiigi me nioxoadipi, codaa mida aneetege licođegi Abraão. <sup>6</sup> Melquisedeque ađica aneetege

licoḡegi Levi, pida dibatege nidiizimo Abraão, liwai niḡicoa lateka. Odaa ja ibinie Abraão, niḡijo ane dibatege niḡijo ane ligegitetege Aneotedoḡoji me yajigote. <sup>7</sup> Ajawienatakanaga me niḡina ane ibinie eledi oko daḡaxa me ḡoneḡegi caticedi niḡini ane ibinie. <sup>8</sup> Niḡijo anida aneetege licoḡegi Levi anodibatibigege nidiizimo niḡica oko, liwai ane nepilidi, niḡidiwa ḡoneleegiwadi anodibatibigege baḡa nigo. Pida lotaganagaḡaxi Aneotedoḡoji mee niḡijo analeegini me yewiḡa ja dibatege nidiizimo Abraão, liwai lateka. <sup>9</sup> Jakataḡa mejinaḡa niḡijo Abraão naḡa yajigo nidiizimo, liwai lateka, odaa Levi micataḡa deḡeledi yajigota Melquisedeque nidiizimo niḡijo Abraão naḡa yajigo, liwai lateka. <sup>10</sup> Levi aniḡica deḡenitini, pida itigi lolaadi nelokodi Abraão niḡijo Abraão naḡa dakapetege Melquisedeque. (Joaniḡidaa leegodi me jakataḡa mejinaḡa Levi maḡaḡa yajigota Melquisedeque nidiizimo niḡijo Abraão naḡa yajigo liwai lateka.)

<sup>11</sup> Niḡijo Aneotedoḡoji naḡa yajigote loiigi Israel niḡijoa lajoinaḡaneḡeco Moisés, iḡe niḡijoa leviitatedi anida aneetege licoḡegi Arão me sacerdotitedi. Pida niḡijo libakedi ayakadi deḡeo niḡidi noiigi midioka limedi me newiḡa miniwataḡa Aneotedoḡoji. Joaniḡidaa leegodi naḡa leeditibige eledi latopagi sacerdoti, liciagi Melquisedeque, pida baadaḡa liciagi Arão. <sup>12</sup> Pida niḡina me leeditibige me diniigi ane latopagi sacerdoti, odaa eledi leeditibige me diniigi lajoinaḡaneḡeco Moisés. <sup>13</sup> Lotaganagaḡaxi Aneotedoḡoji eetece niḡica eledi sacerdoti, codaa

eledi ane licoḡegi, aḡica aneetege licoḡegi Levi. Aḡica otiginitece oko niḡida ane licoḡegi ane dibatema Aneotedoḡoji me nigodi codaa me yalegi eijedi maditaga Aneotedoḡoji nameeja. <sup>14</sup> Jowoogotaga Goniotagodi mida aneetege ane licoḡegi Judá. Pida Moisés aḡica deḡee niḡina oko anida aneetege licoḡegi Judá daḡa yakadi mowo me sacerdoti.

*Ica eledi sacerdoti ane liciagi Melquisedeque*

<sup>15</sup> Digawini jeḡeneḡegi yenikamaga naga diniigi anodaḡee sacerdoti, igaataga jegeno eledi ane latopagi sacerdoti ane liciaceekawa Melquisedeque. <sup>16</sup> Adinoe me sacerdoti daḡa leeḡotedi niḡenatakanegeco anowo licoḡegi Levi me sacerdotitedi. Pida dinoe me sacerdoti leeḡodi iniaa loniciwaga aneo midioka limedi me yewiga, igaataga aḡica ane yakadi me yaḡadi lewiga. <sup>17</sup> Igaataga lotaganagaxi Aneotedoḡoji eetece, niḡijo mee, “Idioka limedi makaami sacerdoti, ḡadiciaceekawa Melquisedeque.” <sup>18</sup> Jiḡidaa naga yaḡadi niḡijo lajoinaganeḡegi Moisés aneetece niḡica ane yakadi me sacerdoti. Igaataga niḡijo najoinaganeḡegi inokeo me sacerdoti niḡina oko ane diḡica loniciwaga, codaa ane diḡica ane jaoga. <sup>19</sup> Igaataga liḡenatakanegeco Aneotedoḡoji aḡica loniciwaga deḡeo oko me iḡenaga. Pida Aneotedoḡoji jeḡeote niḡica eledi ane daḡaxa meletoḡodomi ane inibeonagatege. Odaa leeḡodi niḡica ane inibeonagatege, odaa ja jakataga me jipecaḡatege Aneotedoḡoji, leeḡodi ḡodilaḡatege.

<sup>20</sup> Aneotedoḡoji eote ligegitetege Jesus niḡijo neḡeote me sacerdoti. Pida niḡijo anida aneetege

licoḡegi Levi niḡijo noḡowote me sacerdotitedi, Aneotedoḡoji aḡica deḡeote ligegitetege. <sup>21</sup> Pida niḡijo Jesus naḡa sacerdoti, Aneotedoḡoji eote ligegitetege, meeteta,

“Goniotagodi Aneotedoḡoji eote ligegi codaa aiigi lowoogo.

Niḡida makaami idioka limedi makaami sacerdoti,

digo mijotaḡa Melquisedeque.”

<sup>22</sup> Leeḡodi Aneotedoḡoji meote ligegitetege Jesus, oada Jesus daḡaxa meliodi loniciwaga meote niḡijo Aneotedoḡoji ane ligegitetege, niḡijo neḡeote me ḡodilaḡatacege Aneotedoḡoji meote ḡodewiḡa.

<sup>23</sup> Digawini eledi ane jinaditece. Niḡijo jotigide ijoa owidi sacerdotitedi leeḡodi me nigo oada aḡoyakadi midioka limedi me nibaaga. <sup>24</sup> Pida Jesus biḡidioka limedi miniwa me yewiḡa, oada yakadi midioka limedi me sacerdoti, oada aleeditibige eledi sacerdoti ane waxodi limedi. <sup>25</sup> Joaniḡidaa leeḡodi mida loniciwaga meote midioka limedi me newiḡa niḡina oko ane yadeegiteta Aneotedoḡoji, igaataḡa idioka limedi me yewiḡa me dipokotedibigeloco niḡidi oko miniwataga Aneotedoḡoji.

<sup>26</sup> Enice Jesus jiḡijaḡijoa niḡica sacerdoti ḡoneḡegi ane jopoḡatibige. Ijaḡijoa liciagi Aneotedoḡoji, aḡica deḡeote ane beyagi, aḡica nibeyaceḡegi catiwedi laaleḡena. Aneotedoḡoji iomaḡaditedice Jesus liwigotigi niḡina oko abeyacaḡaga, oada Aneotedoḡoji ja yadeegi me ideite miniwataga mepaa iḡe inoatawece.

<sup>27</sup> Jesus aliciagi niḡijoa eletidi sacerdotitedi ane

leeditibige monigodi eijedi odaa joḡoyajigotalo Aneotedoḡoji inoatawece nokododi, leeḡotedi epaa libeyaceḡeco codaa me libeyaceḡeco eledi oko. Igaataga Jesus epaa diniboote Aneotedoḡoji leeḡotedi libeyaceḡeco oko. Odaa onijoteci meote, odaa aḡalee leeditibige deḡeotace, igaataga niḡijo aneote idioka limedi me diniwaloe. <sup>28</sup> Niḡijoa lajoinaḡaneḡeco Moisés iolaticoace ḡoneleegiwadi me lacilodi-sacerdotitedi, pida niḡidiwa ḡoneleegiwadi inoa libeyaceḡeco. Pida niḡidiaaḡidi Moisés naḡa igodi me idi lajoinaḡaneḡeco, niḡidiaaḡidi Aneotedoḡoji jeḡeote ligegi, odaa ja iolatedice Lionigi, niḡijoa aneote midioka limedi me sacerdoti ane diḡica libatiigi.

## 8

### *Jesus ḡonisacerdoti ḡoneḡegi*

<sup>1</sup> Ijoatawece niḡijoa ḡodotaḡa anejinaḡatece, idiwa ane daḡaxa me ḡoneḡaḡa baanaḡa ejinaḡa natigide. Iniwa ḡonisacerdoti ḡoneḡegi ane nicote liwai libaḡadi Aneotedoḡoji anida loniciwaḡatedeloco inoatawece. <sup>2</sup> Niḡiniwa sacerdoti eote libakedi lodoe iniaaḡiniwa Aneotedoḡoji. Aḡeote libakedi catiwedi nopeḡedi liciagi niḡijo anowo loiigi Aneotedoḡoji niḡijo jotigide, pida libakadi niḡijo nimedi Goniotagodi Aneotedoḡoji ane yoetetema, nimedi ane iḡenaḡa, diḡoida ditibigimedi.

<sup>3</sup> Ijoatawece lacilodi-sacerdotitedi oiolaticoace moyadeegitalo Aneotedoḡoji niḡicoa liboonaga niḡina oko, codaa minoa eijedi anonigodi,



owotibige Aneotedoꝓoji me ixomagateedice libeyacegeco. Joanigidaa leegodi me leeditibige ꝓonisacerdoti ꝓonegegi magaga leeditibige midu ica ane yadeegiteta Aneotedoꝓoji. <sup>4</sup> Diginaagite nigina iigo, agotaꝓa sacerdoti, igaataꝓa owidi sacerdotitedi anoyadeegitalo Aneotedoꝓoji liboonaga nigijo oko, ane liigenatakanegegi najoinaganegeco judeutedi. Codaa Cristo agica aneetetege licogegi Levi daga liciagi nigijoa eletidi sacerdotitedi. <sup>5</sup> Nigidiwa eletidi sacerdotitedi odibatema Aneotedoꝓoji catiwedi nopegedi ane liwigo nigica digoida ditibigimedi, codaa micataꝓa daga liwa nigica ane libakadi Jesus digoida ditibigimedi. Joanigidaa leegodi nigijo Moisés maleekoka doletibige meo ica lopegedi Aneotedoꝓoji, Aneotedoꝓoji yajoi meeteta, “Adowetita, awii liciagi nigini ꝓawinigi ane jikeetaꝓawa digoida maditaꝓa wetiꝓa.” <sup>6</sup> Pida natigide Cristo ja dibatetege libakedi ane daꝓaxa mele caticedi nigijoa jotigide libaketedi nigijoa sacerdotiteditigi nigina iigo. Codaa nigijo Jesus aneote eo Aneotedoꝓoji inaa ꝓoneleegiwadi moyakadi gela nimawenegegi me dinilakidetiwage, eo ane daꝓaxa mele, aliciagi nigijo jotigide anee me dinilakidetetege oko. Igaataꝓa nigijo Aneotedoꝓoji negeote ligegi, nigijo aneetetece daꝓaxa meletoꝓodomi.

<sup>7</sup> Codaa nigijo odoejegi anigotedoꝓowa me dinilakidetedoꝓogi daaditaꝓa naꝓamalaga, Aneotedoꝓoji agotaꝓa leeditibige meote gela anigotedoꝓowa me dinilakidetedoꝓogi. <sup>8</sup> Pida Aneotedoꝓoji laaꝓetedipi loiigi, nigijo naꝓa

doḡowo niḡica ane dinilakidetetege, odaa jeḡee,  
 “ ‘Icotalo nokododi’,  
 mee Goniotaḡodi Aneotedoḡoji,  
 ‘Nige jao gela anejigo me idinilakidetetege loiigi  
 Israel,  
 codaa me loiigi Judá.

<sup>9</sup> Niḡida gela anejigotaḡawatiwaji me  
 idinilakidetagaḡi  
 aliciagi niḡijo oxiiḡodi  
 anejigota me idinilakidetetege jotigide ḡadaamipi,  
 niḡijo noko naḡa jibatigi libaaḡatedi me jadeegit-  
 icogi wetice niḡo Eḡito.

Pida aḡowo niḡijo ane igegi me idinilakidetetege,  
 joaniḡidaa leeḡodi naḡa jikaticoace’,  
 eledi mee Goniotaḡodi Aneotedoḡoji.

<sup>10</sup> ‘Nigicotalo nokododi,  
 nigicota me idinilakidetacege loiigi Israel,  
 jiḡidaaḡee’,  
 eleditace mee Goniotaḡodi Aneotedoḡoji.  
 ‘Jao midioka limedi moyowo iḡenatakanegeco.  
 Codaa jixotediwece catiwedi laaleḡenali  
 micataḡa daḡa jiditedini.  
 Jaotace me Ee Noenoḡodi,  
 idiaaḡidi jaotace me yoiigi.

<sup>11</sup> Aḡaleegica ane leeditibige daḡa iḡaxi  
 lipecaḡawa  
 oteḡexaaḡaḡa nioxoa  
 anodaḡee me yakadi me yowoḡodi Goniotaḡodi  
 Aneotedoḡoji,  
 iḡataḡa inatawece etidowoḡodi,  
 niḡina ane daḡaxa me iwikodadipi  
 codaa me niḡina ane daḡaxa me ḡoneḡaḡa.

<sup>12</sup> Iḡataḡa jiwikodetibigiwaji

codaa jixomagateetedice niġinoa ane daġa  
 iġenagateda loenataka,  
 codaa aġalee nalaġatibigiji ane libeyacegeco,  
 codaa aġalee jiloikatiditibigiwaji.’ ”

<sup>13</sup> Niġijo Aneotedoġoji me eetetece ica gela  
 anigotedoġowa me dinilakidetedoġogi, ikee  
 niġijo oxiiġodi ane domiġigotedoġowa me  
 dinilakidetedoġogi me daġadiaaġica jaoġa. Niġina  
 ane daġadiaaġica jaoġa, codaa moxiiġodi, jegele  
 me ixomagaġtijo.

## 9

### *Niġica anodaagejinaġa mewi me joġeeġatalo Aneotedoġoji*

<sup>1</sup> Digawini, niġijo Aneotedoġoji meote niġijo  
 odoeġegi anigote me dinilakidetetege oko,  
 ikeetediogi niġica ane leeditibige me eetibigiwaji  
 niġina modoġetetalo niġijo oko, codaa ikeetediogi  
 niġijo oko anodaagee moyoe niġijo aneiticoace  
 modoġetetalo. <sup>2</sup> Odaa joġodabiteġetini niġijo  
 lopeġedi anijoa iniwataale letiidi. Ica odoeġegi  
 le beġeneġegi niġeticogi we, one liboonagadi,  
 “Nopeġedi-le anoimaġaditema Aneotedoġoji”.  
 Niġini lopeġedi-le ada noledaġaxi, acaagaca  
 nameeja, icaaġicoa paontedi anoibootalo  
 Aneotedoġoji. <sup>3</sup> Codaa onada aca lipeġeteġe ane  
 iomaġaditiwage niġidiwa iniwataale letiidi niġijo  
 nopeġedi. Ica eledi le aneneġegi diġetiwece  
 catiwedi ane liboonagadi, “Nopeġedi-le aneite  
 Aneotedoġoji.” <sup>4</sup> Catiwedi niġini eledi nopeġedi-  
 le, adi aca nameeja oolo aneite moyalegi  
 ica najidi ane liditege lanigi, codaa adi aca

iwokodaḡaxi aneo me nalaḡatibigoḡoji maleekoka dinilakidetedoḡoji Aneotedoḡoji. Naḡadi iwokodaḡaxi onileḡeta oolo. Catinedi naḡadi iwokodaḡaxi ada aca boote anei moyotete ica niweenigi Aneotedoḡoji ane yajigotediogi loiigi niḡijo jotigide, anodita “Maná”. Codaa catinedi adiaaḡadi naḡadi iwokodaḡaxi idi niḡijo ligiilaḡadi Arão anidioka limedi me dione, icaaḡicoa itiwataale wetiadi ane liciaceekawa taaboa ane diniditelogo liiḡenatakanegeco Aneotedoḡoji. <sup>5</sup> Ditibigimedi naḡadi iwokodaḡaxi idoa itoataale aanjotedi noenataka oolo, anoditalo “Querubins”. Niḡidoa querubins oikee Aneotedoḡoji miniwa. Oixaketedice labadi oyapoḡoditini libato naḡadi iwokodaḡaxi. Niḡidi ditibigimedi naḡadi iwokodaḡaxi one liboonḡadi “Banco aneite Aneotedoḡoji me iwikode oko.” Natigide aḡalee jakataḡa me jeloḡotaḡa anodaḡee ica nopegedi.

<sup>6</sup> Niḡidiaaḡidi naḡa igo niḡicoa iniwataale letiidi niḡijo nopegedi, niḡijoa sacerdotitedi dakatiobece inoatawece nokododi catiwedi niḡijo odoejegi le niḡijo nopegedi. Dakatiobece mowote libakedi moyaxawa noiigi modoḡetetalo Aneotedoḡoji. <sup>7</sup> Pida ijotawece niḡijo ane lacilodi-sacerdotitedi me dakatiobece minitaḡaeledi nopegedi-le anoyatigi me “Nopegedi-le ane itedibiga Aneotedoḡoji”, codaa onidateci nicaaḡabi onidateci me dakatio. Niḡina me dakatio, idioka limedi me yadeegitedio eijeegagi lawodi anoyelodi. Ibootalo Aneotedoḡoji niḡijoa lawodi eijeegagi eotibige Aneotedoḡoji me ixomaḡateetedice epaaḡaḡa libeyaceḡeco, codaa me libeyaceḡeco niḡijo noiigi. <sup>8</sup> Leeḡodi

me ijokijota ica lacilo-sacerdotitedi me dakatio, Aneotedoꝑoji Liwigo ikee niꝑidi noiigi maleedaꝑa yakadi me dakatiobece aneite Aneotedoꝑoji. Niꝑijo maleegica ica nopegedi, dinoxoco ica lapoagi miditaꝑa ica aneite Aneotedoꝑoji. <sup>9</sup> Ica nopegedi jotigide, nikeetoꝑowa ica ꝑoligi aneote Aneotedoꝑoji natigide mejoꝑota lodoe iniaaꝑiniwa Aneotedoꝑoji. Niꝑijoa eijedi inaaꝑinoa eletidi ni boonaa ica noiigi anoyajigotalo Aneotedoꝑoji niꝑica jotigide aꝑica loniciwaa daga iwilegi laalegenali oko anoyemaa modoꝑetetalo Aneotedoꝑoji. <sup>10</sup> Icoa nakataꝑa jotigide inoka odiiꝑaxinaꝑatece ica anoyakadi mowacipeta codaa moyeligo, codaa anodaagee me niwilecaꝑa. Inaaꝑinoa lakataꝑa anetiꝑodiꝑaxitece anodaagee me idowetaꝑateloꝑo ꝑodolaadi. Niꝑinoa nakataꝑa aꝑaleegica niwaló niꝑijo Aneotedoꝑoji naꝑa dinilakidetacedoꝑoji.

<sup>11</sup> Pida Cristo jiꝑijoa menagi. Jiꝑiniaaꝑiniwa niꝑicoa sacerdoti ꝑoneꝑegi ane nadeegi inoa anele. Niꝑica nopegedi analeegite me diba daꝑaxa mele caticedi niꝑijo oxiiꝑodi nopegedi, codaa aꝑica libeyacaꝑajegi. Igaataꝑa aꝑoneleegiwa loenataꝑi niꝑica nopegedi, codaa aꝑicatigi niꝑina iigo. <sup>12</sup> Niꝑijo naꝑa yakagiditedeloco niꝑini nopegedi, odaa ja dakatedio miditaꝑa aneite Aneotedoꝑoji. Onijoteci me dakatedio, codaa ayadeegitedio lawodi waxigida oteꝑexaaꝑa waca-lionigi. Pida yadeegitedio epaa lawodi me yajigote Aneotedoꝑoji, niꝑijoa lawodi ane nadooꝑodi madataꝑa nicenaaꝑanaꝑate. Jiꝑidaa eotedibige Aneotedoꝑoji me yakadi me iwilegi

gobeyacegeco codaa meote midioka limedi me godewiga. <sup>13</sup> Niğica jotigide oibake lawodi waxigida codaa me alolanaga, icaagica lajimaga waaca lioneke anoyalegi, odaa joğoilaagağaditiogi oko abeyacağaga moiwilegitema loolatedi icoa libeyacegeco, owotibige moyakadi modoğetetalo Aneotedoğoji. <sup>14</sup> Pida lawodi Cristo dağaxa meliodi loniciwaga. Cristo ağica libeyacağajegi codaa ağica libatiigi. Codaa Liwigo, ane dağa yeleo, yaxawa me dinibooteta Aneotedoğoji. Lawodi iwilegitema godaalegena niğinoa godoenataka ane beyagi, niğinoa anowote me godelo. Godiwilegi eotedibige me jakatağa me jaoga gobakeditema Aneotedoğoji, ane ewikegi.

<sup>15</sup> Leeğodi Cristo me dinibooteta Aneotedoğoji, jiğiniaağiniwa ane itedigi liwigotigi, Aneotedoğoji inaağoko, odaa jeğeote gela nimaweneğegi me dinilakidetetege Aneotedoğoji inaağoko. Joanigidaageote Aneotedoğoji niğijo ane enidite me nepilidi, eotedibige moyakadi modibatege inoa anele anakaa ligegi Aneotedoğoji me yajigotediogi, niğinoa ane dağa daateda. Aneotedoğoji yakadi me yajigo niğinoa anele igaatağa niğijo Jesus nağa yeleo, odaa ja noğatedicoace oko me itelogo libeyacegeco anowote niğijo maleeğijo niğijo odoejegi nimaweneğegi me dinilakidetetege Aneotedoğoji.

<sup>16</sup> Niğina me dinilakidetedoğogi Aneotedoğoji liciagi niğijo nakatigi midi niğina oko ane yeleo. Niğina me yeleo niğina oko ane dinepie. Nigidiaagidi niğicoa ane nepilidi joğoiğitaeledi oko anepaa yemaa me yajigota maleediğicatibige me yeleo. Odaa odibatege

nigicoa ane nepilidi idokidata nige yeleo nigijo oko. <sup>17</sup> Nigida nakatigi agica ane yaxawa nigijo anonibeotege modibatege ane nepilidi nigina oko analeedaga yeleo. Nigida nakatigi idoka diniwaloe nigina naga yeleo nigini ane dinepie, igaataga nigidiaagidi odaa nigina eledi jogoyakadi modibatege nigicoa ane nepilidi nigijo ane yeleo. <sup>18</sup> Joanigidaa leegodi nigijo odoejegi anigotedogowa me dinilakidetedogogi Aneotedogoji, nigijo jotigide idoka diniwaloe nigina monadoogodi lawodi eijedi. <sup>19</sup> Odoejegi Moisés me yelogoditiogi noiigi inoatawece liigenatakanegeco Aneotedogoji ane iigete me iditedini. Nigidiaagidi naga dibatalo lawodi wacawaanigi inaa waxigida, odaa ja yawanagaditege ninyogodi, odaa nigidiaagidi ja ibake aca nawodigije ane liboonagadi “hissopo” icaagica waxacoco lamodi anowo me ixagodi. Odaa ja dibatalo ijoa lawodi yawanagaditege ninyogodi, datikata nagada nawodigije, odaa ja iticogeteloco notaganagaxi aniwotelogo niigenatakanegeco, codaa iticogeteloco iditawece noiigi. <sup>20</sup> Odaa jeege, “Nigidiwa lawodi joanigidiaa ane ikee Aneotedogoji meote anigotedagawa me dinilakidetedagagitiwaji. Dinilakidetedagagi Aneotedogoji mawii nigina ane iigetedagawa.” <sup>21</sup> Idaagaagigota Moisés me iticogeteloco lawodi lopegedi Aneotedogoji codaa inoatawece anoibake modogetetalo Aneotedogoji. <sup>22</sup> Ewi nigijo jotigide Aneotedogoji iige loiigi me domogoiwilegitalo icoatawece nigicoa lanodi anoibake modogetetalo. Oibake eijeeagagi lawodi

noḡoiwilegi. Idoka yakaditeda Aneotedoḡoji me ixomaḡateetedice libeyaceḡeco oko niḡina monadoḡodi lawodi eijedi.

*Leeḡodi Cristo me yeleo, odaa ja yakadi Aneotedoḡoji me iwilegi ḡobeyaceḡeco*

<sup>23</sup> Niḡinoa lanodi niḡini nopegedi anoiwilegitalo lawodi eijedi owote me liwigo niḡicoa anidiwa digoida ditibigimedi. Leeditibige moiwilegita lawodi eijedi niḡinoa enodi digoina iḡo. Pida icoa enodi digoida ditibigimedi oyopotibige lawodi ane daḡaxa mele me yapitaḡadi.

<sup>24</sup> Iḡaataḡa Cristo adakatediwece nopegedi ane loenatagi ḡoneleegiwa. Niḡijo nopegedi onowote me liwigo niḡica digoida ditibigimedi ane dakatediwece. Idiaa dakatediwece ditibigimedi lodoe Aneotedoḡoji me dipokotedoḡoloco natigide.

<sup>25</sup> Inoatawece nicaaḡape ica nisacerdoti-lacilo judeutedi dakatiwece Aneotedoḡoji liḡeladi. Dakatiobece niḡica diimigi-le Aneotedoḡoji ane iomaḡaditedice mepaaḡite, odaa yadeegitediobeci lawodi eijedi. Pida Cristo boḡonijotece me dakatedio me diniboote Aneotedoḡoji.

<sup>26</sup> Daḡaleetiḡidaaḡee daḡanagawini, idioka limedi me dawikode niḡijo maleekoka yoeteda Aneotedoḡoji niḡina iḡo codaa niḡina natigide. Pida aniḡidaaḡee. Natigide, ja dinojogotedini icoa owidijedi nokododi, odaa ja dinikee digoina iḡo onijoteci me dinikee me dinajigo me yeleo eotedibige me noḡa libeyaceḡeco oko. <sup>27</sup> Inatawece oko icota me nigo, odaa onidateci me yeleo niḡina oko. Odaa Aneotedoḡoji ja iwi niḡica anigoteta. <sup>28</sup> Jiḡidaaḡee



Cristo monijoteci me dinajigo moyeloadi. Yeleo eotedibige me noḡa libeyaceḡeco eliodi oko. Aḡaleegenagi daḡa yeletacedeloco oko libeyaceḡeco. Pida dopitedijo meote me newiḡatace ijotawece niḡijo anonibeoteḡe nige dopitacedijo.

## 10

<sup>1</sup> Icoa najoinaḡaneḡeco judeutedi micataḡa daḡa liwa niḡinoa anele Aneotedoḡoji ane niwakateetedibigoḡoji, codaa aliciagi micataḡa doḡoka liwigo. Odaa inoatawece nicaaḡape onigodi eijedi leeḡodi libeyaceḡeco, codaa owote anodaa niḡenatakanegeco. Pida lemeḡegi niḡinoa eijedi aḡica loniciwaga deḡeo me iḡenagatibigiwaji, codaa aḡeo me diḡica libatiigi, niḡina oko anoyemaa mototalo Aneotedoḡoji.

<sup>2</sup> Niḡina oko anodoḡetetalo Aneotedoḡoji daaditiḡicata libatiigi oditaḡa ewi, agotaḡalee odeemitetece me dinilaagetee, codaa taḡaga oika monigodi inoa eijedi leeḡotedi libeyaceḡeco.

<sup>3</sup> Pida aniḡidaaḡee. Niḡina monigodi eijedi, eotibige idokida ina oko monalaḡatibige inoa libeyaceḡeco inoatawece nicaaḡape. <sup>4</sup> Iḡataḡa lawodi alolanadi, waxigidatedi aḡica loniciwaga me noḡa libeyaceḡeco oko.

<sup>5</sup> Joanigidaa leeḡodi maleeka doletibige Cristo menagi niḡina iḡo, odaa meeteta Aneotedoḡoji, “Aḡemaani niḡina oko monigodi eijedi leeḡotedi libeyaceḡeco oteḡexaaḡaga niḡinoa niḡoonagataḡawa niḡina oko.

Pida idi yolaadi ane oenitomi me jiḡeladetigi.

<sup>6</sup> Ageo maniniitibeci niḡina oko moyalegi niḡinoa eijedi

maditaḡa ḡanameeja wetiḡa,  
oteḡexaaḡaḡa niḡina monigodi niḡinoa eijedi.

<sup>7</sup> Odaa meji,

‘Ite Ee ina, ja idigo, Inoenogodi,  
janagi me jaote anemaani.

Jiḡidaaḡee moiditeloco aneetici maditaḡa  
ḡadotaḡanaḡaxi.’ ”

<sup>8</sup> Niḡijo Cristo neḡeetetece niḡijoa lotaḡa baanaḡa jidiḡatedini, mee, “Aḡemaani niḡina oko monigodi eijedi modoletibige monoḡa libeyaceḡeco, oteḡexaaḡaḡa niḡinoa liboonagataḡawa niḡina oko, oteḡexaaḡaḡa niḡina moyalegi niḡinoa eijedi maditaḡa ḡanameeja wetiḡa. Aḡaniniitibeci niḡina oko mowote niḡida loenataḡi.” Jiḡidaa ligegi, idaḡida monigodi eijedi anodaḡee icoa niḡenatakanegeco me ikeetiogi. <sup>9</sup> Odaa jeḡee Cristo, “Ite Ee ina, ja idigo, Inoenogodi. Janagi me jaote anemaani.” Jiḡidaaḡee Cristo me yaḡadi niḡijo ligileḡegi oxiiḡodi monigodi eijedi modoletibige monoḡa libeyaceḡeco niḡidi oko, odaa jeḡeote gela lakatigi niḡijo naḡa yajigo epaa lolaadi. <sup>10</sup> Leeḡodi Jesus Cristo meote ane yemaa Aneotedoḡoji, odaa yajigo epaa lolaadi moyeloadi, odaa onijoteci me yeleo leeḡotedi libeyaceḡeco oko, ḡodawalaceteteḡe ica ḡobeyaceḡegi eote moko nepilidi.

<sup>11</sup> Inoatawece nokododi niḡina sacerdoti judeu icotio meote ane libakedi, odaa elioditibece monigodi eijedi modoletibige monoḡa libeyaceḡeco oko. Pida lemeḡegi niḡijoa

eijedi ayakadi me noga libeyacegeco oko. <sup>12</sup> Pida Jesus, ane Gonisacerdoti gonegegi, onijoteci me dinibootedio moyeloadi leegotedi libeyacegeco oko, odaa nigijo loenatagi idioka limedi me diniwaloe. Odaa nigidiaagidi ja nicotedi liwai libaaagadi Aneotedofoji. <sup>13</sup> Odaa jigidiaagite Jesus me walite nigepaaagicota Aneotedofoji meote me ipoditedeloco nelogododipi. <sup>14</sup> Jigidaagee Jesus onijoteci me yeleotedeloco libeyacegeco oko, odaa jigidaa leegodi meote midioka limedi me igenaga nigina oko anakaa iomagaditedicoace mepaa nepilidi.

<sup>15-16</sup> Odaa ica Aneotedofoji Liwigo nikeetogowa nigidaagee. Igaataga odoejegi mee,  
 “Jigidaagejigota me idinilakidetege ane jao niginoa nokododi,  
 mee Goniotagodi Aneotedofoji,  
 ‘Idejate iigenatakanegeco catiwedi laalegenali,  
 codaa jaote midioka limedi moyowo  
 iigenatakanegeco.’”

<sup>17</sup> Nigidiaagidi mee,  
 “Agalee jema daga nalagatibigiji nigicoa libey-  
 acegeco,  
 otegeexaagaga nigijo me degetidadiwagadi.”

<sup>18</sup> Enice nigina Aneotedofoji naga noga libey-  
 acegeco oko, agalee leeditibige dogonigodi eijedi  
 leegotedi libeyacegeco.

*Jakataga miniga jipecaagatege Aneotedofoji*

<sup>19</sup> Enice, inioxoadipi, abo godaalegena me jakagatio aneite Aneotedofoji leegodi Jesus me nadoogoditedogoloco lawodi. <sup>20</sup> Eote gela gonaigi mejogetalo Aneotedofoji. Micataga

nigica naigi daga igotece madataga aca lipegetege epoacajo minitaga Aneotedogoji ligeladi. Jesus, anewikegi, jiginiaaginiwa nigijo naigi leegodi me yajigo epaa lolaadi moyaagadi, digo majotaga nagajo lipegetege epoacajo me daa. <sup>21</sup> Odaa ini ica gonisacerdoti gonegegi ane dowediteloco Aneotedogoji loiigi. <sup>22</sup> Enice iniga jipecaagatege Aneotedogoji, jinaga jikanaga godaalegena daga godinaale, pida ejiwagataga ajawienaga. Lawodi Jesus noga moko nilaagedi, odaa godapiditema inoatawece gobeyacegeco, micataga nigina ninyogodi ane yapidi me yapitagadi godolaadi. <sup>23</sup> Idioka limedi me inibeonagatege ica gonaajegi Aneotedogoji ane ligegitedogowa, me daga jawienagateda, igaataga Aneotedogoji idioka limedi meote nigina ane ligegi. <sup>24</sup> Eleditace, jowooga nigica anodaagee me jakataga me jaxawanaga me idatawece idinemaanagatiwage, codaa me jaxawanaga inatawece mowote anele. <sup>25</sup> Jinaga jikanaga me jatecogojogo me jilokagatege eletidi anonakato Goniotagodi anee nigina eledi oko, ane daga yatecogotibece. Pida joniciwagataga eledi oko, enegegi jaogate igaataga me jinataga ja nipegi nigica noko nige dopitedijo Goniotagodi.

<sup>26</sup> Igaataga nigidapaga iniwinagata midioka limedi me jaoga ane beyagi, codaa nige daga jikanaga me jaoga, idaaagida naga jowoogotaga anewi, agica eledi gonimawenegegi menitedice gobeyacegeco. <sup>27</sup> Pida idoka jakataga me idoiigata nigica noko Aneotedogoji nige iwi anigotedogowa, codaa me godiloikatidi minitaga noledi ane daga

ipe, ane yalegi niḡicoa nelogododipi Aneotedoḡoji.  
<sup>28</sup> Niḡica jotigide niḡina iniwataale oḡoa domige iniwatadiḡini oko noḡodi monadieledi oko meo ane daḡa ikata meo niḡijo liḡenatakanegeco Aneotedoḡoji, oḡaa oyeloadi niḡijo oko, aḡica doḡoiwikode. <sup>29</sup> Enice amiida ica anakatitiwaji? Igamigote Aneotedoḡoji ina oko anododigotalo Lionigi Aneotedoḡoji micataḡa daḡa naagogo, codaa igamigigote Aneotedoḡoji niḡina oko ane daḡa deemitetigi lawodi Cristo, Aneotedoḡoji ane dibatetege, meote gela nimaweneḡegi me dinilakidetedoḡogi? Niḡidiwa lawodi eo niḡina oko me yapidi, pida niḡina oko ane daḡa deemitetigi lawodi Cristo idigotalo micataḡa daḡa liciaco eijedi lawodi. Codaa niḡina oko beyagi me dotaḡatibige Aneotedoḡoji Liwigo anidioka limedi meliodi meletedoḡodomi. Aneotedoḡoji eliodi me iloikatidi niḡina oko liciagi. <sup>30</sup> Igaataḡa jowoogotaḡa niḡijo nidigo anee, “Emeḡeeta jiloikatidi niḡina oko leeḡodi niḡinoa anowote ane beyagi, idinilakidetege.” Codaaeledi ijo nidigo anee, “Goniotagodi iwi anigotediogi loiigi.” <sup>31</sup> Nige iniaaḡiniwa Aneotedoḡoji ewikegi iwi anigote oko leeḡodi libeyaceḡegi, oḡaa niḡina oko eliodi me doḡitibigiwaji.

<sup>32</sup> Analakitibigetiwaji anodaḡeni niḡijo jotigide. Niḡidiaaḡidi Aneotedoḡoji naḡa ikeetedaḡawatiwaji nilokokena, eliodi mawikodee, pida aḡetiḡadakati. <sup>33</sup> Idatibece niḡina ḡanelogododipi etiḡadiweenigenitice codaa moyametibigaḡajitiwaji lodoe noiigi. Idatibece ja ḡadigomitiwaji me

adinawanagatitege nigijoa ane nawikodeega.  
<sup>34</sup> Nigida makaamitiwaji iwikodeni nigina ane idei niwilogonagaxi leegodi eliwagatakanegegi, codaa ele maniniitibeci nigina modoliceta nigina ane ganebi, igaataga owoogotitiwaji me idi ganagajegi ane dagaxa mele, codaa ane digicata daa daa. <sup>35</sup> Enice idioka limedi mawii mabo gadaalegena manakatoni Aneotedogoji, igaataga yajigotedagawa nigica ganagajegi anele. <sup>36</sup> Adinatiitalo mawii gadawikodico Aneotedogoji ane yemaa, odaa nigidiaagidi akati mabaatege nigijoa ane ligegitedagawa me yajigotedagawa. <sup>37</sup> Igaataga diniditelo loco lotaganagaxi Aneotedogoji,  
 “Onanagateciyadiwa nokododi,  
 odaa Nigijoa anicota menagi,  
 jegenagi,  
 codaa ayajebi.  
<sup>38</sup> Odaa nigina oko ane igenaga idioka limedi me yewiga leegodi me idadiwagadi. Pida nigina oko anopitege lowidi, ageo me idinitibeci.”  
<sup>39</sup> Nigida moko agoko nigina anopitege lowidi, odaa jaganiatagigipi. Pida бага ejiwagataga Goniotagodi, odaa idioka limedi me godewiga.

## 11

### *Ica oko anoyiwagadi Goniotagodi*

<sup>1</sup> Igamodaagee ica mewi mejiwagataga Goniotagodi? Nigina mejiwagataga, ajawien- atakanaga me jibagatege nigica ganagajegi

ane ligegitedogowa Aneotedogoji. Nişina mejiwaşatanaşaga, jowoogotaşa mewi minoa nişicoa analee daşa jakataşa me jinataşa. <sup>2</sup> Nişica jotigide inatecibece oko anonakato Aneotedogoji, odaa Aneotedogoji ninitedibece leegodi nişijo oko monakato.

<sup>3</sup> Leegodi mejiwaşataşa, jowoogotaşa nişijo jotigide Aneotedogoji mee, odaa işşo, codaa minoatawece aninoa digoida ditibigimedi ja dinikee. Ibake nişinoa ane daşa jakataşa me jinataşa meote nişinoa ane jakataşa me jinataşa.

<sup>4</sup> Nişijo jotigide, Abel naşa yadeegi eijeegagi me ibootalo Aneotedogoji, nişijo ane yadeegi daşaxa mele catedi nişijo liboonigi Caim anaşaga yadeegitalo Aneotedogoji leegodi Abel me nakato Aneotedogoji. Odaa leegodi Abel me nakato Aneotedogoji, odaa Aneotedogoji ikee me yakadi Abel me işşenaşa nişijo naşa dibatetege nişijo Abel liboonigitalo. Eleditace, leegodi Abel me nakato Aneotedogoji, odaa micataşa daşalee şşodotaşaneşe, idaaşidata naşa jotigide me yeleo.

<sup>5</sup> Leegodi Enoque me nakato Aneotedogoji, odaa ayeleo, pida Aneotedogoji yadeegitedibigimece ditibigimedi, odaa aşaleegica monadi. Aneotedogoji lotaşanaşaxi mee Aneotedogoji me ninitedibece maleedişicatibige daşa yadeegitedibigimece ditibigimedi. <sup>6</sup> Nişina oko nişe daşa nakatoteda Aneotedogoji, nişina oko aşica nimaweneşegi dogodocaşatalo Aneotedogoji. Igaataşa nişina oko ane yemaa micotalo Aneotedogoji leeditibige meyiwaşadi miniwa Aneotedogoji, codaa Aneotedogoji me

yaxawa niḡina oko ane dinoniciwaḡadi me doletibige.

<sup>7</sup> Leeḡodi Noé nakato Aneotedoḡoji, odaa wajipatalo niḡijo naḡa yajoitetece Aneotedoḡoji niḡinoa ane doide ane ixomaḡateetedijo, niḡinoa analee daḡa yakaditeda me nadi. Doitalo Aneotedoḡoji, odaa jeḡeo naḡajo etogo-nelegi, odaa jiḡidaa leeḡodi loiigiwepodi nebi naḡa iwoko niḡijo ninyoḡodi naḡa yapoḡoditini iḡo. Joaniḡidaa me ikee minatawece oko nilaagetedipi niḡina iḡo, odaa Aneotedoḡoji yakadi me iḡenaga Noé leeḡodi eliwaḡatakaneeḡegi.

<sup>8</sup> Leeḡodi Abraão me nakato Aneotedoḡoji, odaa jeḡeyiwaḡadi niḡijo naḡa eniditeta. Odaa jiḡigo miditaḡa ica iḡo Aneotedoḡoji ane ligegita me yajigote me nebi. Niḡica naḡa noditice ayowoḡodi niḡica ane diiticogi. <sup>9</sup> Leeḡodi me nakato Aneotedoḡoji, odaa jiḡidiaa liḡeladi niḡidi nipodigi micataḡa daḡa iomiḡigi miditaḡa niḡidi nipodigi Aneotedoḡoji ane ligegite me yajigoteta. Diḡeladetigi nopegedi noiigiwa Isaque ijaa Jacó. Aneotedoḡoji eledi ligegiteta Isaque ijaa Jacó me yajigotediogi idiaaḡidi niḡidi nipodigi. <sup>10</sup> Abraão liḡeladi nopegedi leeḡodi me nibeotege aca nigotaḡa Aneotedoḡoji ane lowoogo meote. Odaa jeḡeote naḡani nigotaḡa aninoa lipodaḡalatedi ane diḡicata ane yakadi me yaaḡadi.

<sup>11</sup> Leeḡodi monakato Aneotedoḡoji, odaa jeḡeote loniciwaḡa Abraão ajaa Sara mijo lionigi, idaaḡida naḡa laxokodi, codaa Sara mina aḡica lionigi majo. Aneotedoḡoji eote loniciwaḡa Abraão leeḡodi meyiwaḡadi niḡijo neḡeote ligegitetege.



<sup>12</sup> Abraão ja dağaxa moxiigodi dağaleegica lionigi, ja liciagi niğina oko émegegi. Pida mijo owidi lawağa, ajakatağa me inilaagatağa, liciagi yotetitedi digoida ditibigimedi, codaa me liciagi dotiwadi liniogotibece akiidi-eliodi.

<sup>13</sup> Iditawece niğidi oko onakato Aneotedoğoji neğepaağicota me nigo. Niğidi oko anogodibatege niğica Aneotedoğoji ane ligegi me yajigotediogi, pida micatağa doğonadita digoida ditigedi, odaa joğoyiwağadi, codaa ninitibigiwaji niğijo noğonadi niğijoa Aneotedoğoji ane ligegi meote. Anodaagee mijo me newiğa ikee micatağa dağa iomağaga, codaa micatağa dağa oko ane diğica epaa ligeladi digoina iigo, idioka limedi malatitibigiwaji. <sup>14</sup> Niğina oko anowote niğida niciagi oikeetiogi inatawece oko modoletibige niğica nipodigi anicota me nebi. <sup>15</sup> Odaa ağalee lowoogo doğodopita niğicoa niğotedi anoicoğoticogi. Doğoyemaa me dopitibeci, domağa yakadi doğoyemaa. <sup>16</sup> Pida odoletibige nipodigi bağa dağaxa mele, niğica nipodigi digoida ditibigimedi. Odaa Aneotedoğoji aniboliğatetece moyatedigi “Inoenogodi”, igaatağa ja igodi me yoe nağaca nigotağa ane yajigotediogi.

<sup>17</sup> Abraão nakato Aneotedoğoji niğijo Aneotedoğoji nağa dineeteta. Ibootalo Aneotedoğoji Isaque, niğijo anokijoteci me lionigi. Aneotedoğoji ligegiteta Abraão me yajigoteta owidi lawağa. Pida Abraão idokee me ibootalo Aneotedoğoji Isaque, codaa ja domağa igo me yeloadi me ibootema Aneotedoğoji.

18 Aneotedoꝝoji jigijo meete Abraão, “Jao Isaque me eniodi, codaa mowidi lawaꝝa.” 19 Abraão yowoꝝodi codaa meyiwaꝝadi Aneotedoꝝoji me yakadi meotace me yewiꝝa Isaque, daꝝa yeleo. Niꝝijo Aneotedoꝝoji me daꝝa ikateda Abraão me yeloadi Isaque, oada micataꝝa Aneotedoꝝoji deꝝeotace me yewiꝝa, oditaꝝa ja yopilaꝝadite Abraão.

20 Leegodi Isaque me nakato Aneotedoꝝoji, dipokotalo Aneotedoꝝoji me ibinie Jacó ijaa Esaú, codaa meletetema niꝝijo itoataale dinioxomigi niꝝijo malee newiꝝa.

21 Jacó nakato Aneotedoꝝoji, codaa joaniꝝidaa leegodi, niꝝijo naꝝa niꝝeꝝi me yeleo, oada ja dipokotalo Aneotedoꝝoji me ibinie ijoa itoataale lionaꝝa José. Niꝝijo naꝝa dipokotalo, Jacó digiilaꝝatedeta ligiilaꝝadi, oada ja doꝝetetalo Aneotedoꝝoji.

22 José nakato Aneotedoꝝoji, niꝝijo naꝝa niꝝeꝝi me yeleo, oada jeꝝeetece niꝝica noko ica loiigi Israel micota me noditicoaci Egito. Oada ja ya-joitece anodaa leeditibige modigota lolaadi nige yeleo.

23 Niꝝica jotigide eliiododipi Moisés onakato Aneotedoꝝoji. Joaniꝝidaa leegodi moyaꝝaditini Moisés niꝝijo neꝝenitini, icoatigilo iniwatadiꝝini epenaitedi. Onadi me libinienigi niꝝica nigaanigawaanigi, codaa aꝝodoita moyotigimade liiꝝenatakaneeꝝegi ninionigi-eliodi Egito me nigodi nigaanigipawaanigi.

24 Leegodi me nakato Aneotedoꝝoji, Moisés naꝝa ꝝoneleegiwa oada aꝝalee yemaa modita me lionigi aca liona Faraó, ninionigi-eliodi Egito.

25 Pida idapaḡa niwita me lawikodaḡawepodi loiigi Aneotedoḡoji, idiḡida ayemaa ḡaḡa dioteci lakataḡa noiigitigi Egito, oditaḡa eo ane beyagi. Leeḡodi me yowoḡodi monateciḡidiwa nokododi me ḡodewiḡa niḡina iiḡo. 26 Moisés ḡaḡaxa me yakadi mele me dawikode codaa monietibige leeḡodi me dibatema Aneotedoḡoji, diḡo mijoataḡa Cristo me dawikode. Codaa ayakadi mele me nepilidi icoatawece niḡicoa ane niliicagajetecidi Egito. Codaa micataḡa ḡaḡa iwita niḡica naḡajegi Aneotedoḡoji ane yemaa me yajigoteta.

27 Moisés noditicogi nipodigi Egito leeḡodi me nakato Aneotedoḡoji, idiḡida aleḡodi ḡaḡa doita inionigi-eliodi ane yelatema. Dinatitalo inoatawece micataḡa ḡaḡa nadi niḡicoa Aneotedoḡoji, ane diḡica oko ane yakadi me nadi. 28 Leeḡodi eliwaḡatakaneeḡitema Aneotedoḡoji, oḡaa ja yojogoti oḡoejegi nalokegi anodita me Páscoa, oḡaa ja iiḡe loiigi moyatitalo lapoaco lawodi waxacoco, eotibige ica aanjo ḡonematagodi me ḡaḡa nigoditeda oḡoejedi lionaḡa niḡidi loiigi Israel.

29 Leeḡodi monakato Aneotedoḡoji, loiigi Israel odigotinigi liwigotinigi akiidi-eliodi anodita me “Lixagoteḡegi”. Ica ninyoḡodi ja diḡoxati-coace, oḡaa joḡodigotinigi iiḡo ane yadilo. Pida niḡijoa niodaḡawadi Egito niḡijo naḡa domaga diḡetita, oḡaa ninyoḡodi ja yapoḡoditiniwace, oḡaa joḡoḡeḡaḡa.

30 Leeḡodi eliwaḡatakaneeḡegi niḡijo noiigi Israel, niḡijo naḡa onawiile nibaloote nelegi

nigotaḡa Jericó niḡijoatigilo seete nokododi, odaa niḡijo baloote jegenitini. <sup>31</sup> Aca Raabe, one ewocoma, pida ikee me nakato Aneotedoḡoji niḡijo mele me dibatege catiwedi liḡeladi niḡijoa israelitatedi anigotibeci moiḡoadita nigotaḡa me diḡica ane yowoḡodi. Leeḡodi Raabe me nakato Aneotedoḡoji, odaa ayeleo aḡawatege niḡijo eledi niḡeladimigipi ane doḡoyiwaḡaditeda Aneotedoḡoji.

<sup>32</sup> Jakadi daḡa jowidaḡatee yotaḡa, pida aḡaleeḡabo inimedi daḡa idalaḡata Gideão, Baraque, Sansão, Jefte, Davi, ijaa Samuel, ijaḡijo anoyeloḡoditedibece Aneotedoḡoji lowooko. <sup>33</sup> Leeḡodi monakato Aneotedoḡoji, oideleḡe eletidi noiika, pida idokee moiḡeke. Niḡijo naḡa niḡenatakanaga owote niḡica ane iḡenaga, odaa Aneotedoḡoji ja yajigotediogi niḡijo ane liḡegitediogi meote. Leeḡodi monakato, Aneotedoḡoji noxoco liaontedi niolatedi niḡina midatibece ane doide. <sup>34</sup> Ideite liwigotigi noledi, pida anabidaḡa, iwoko me nigodi nodaajo-oḡaḡataḡa. Idiaḡidi ijo me aḡamalaḡaga, pida niḡidiaḡidi jeḡeote me loniciwegaḡa. Niḡina me nidelaḡa ida loniciwaga, odaa joḡoiḡeke inoa iodagaḡawadi iomaḡaga. <sup>35</sup> Leeḡodi monakato Aneotedoḡoji, ijo iwaalepodi anodibataceḡe lionaga me newiḡatace, idaaḡida naḡa domaḡa nigo. Niḡijo eledi oko anidiaḡidi niḡidi noiigi nawikodeeḡa me iteloco libaaḡadi laxakawepodi neḡepaaḡicota me nigo. Aḡoyemaa me beyagi modotaḡatibige Aneotedoḡoji oditaḡa dinikaticoace me diniwilotibigiwaji

leegodi moyiwaḡadi Aneotedoḡoji meote me newiḡatace midioka limedi me idei Miniwataga, codaa meote ane daḡaxa mele lewiḡa. <sup>36</sup> Ijo eledi onietiniwace codaa monalaketiniwace, inaaḡeledi oigoetiniwace, odaa oyokoletiwace niwilogonaḡaxi. <sup>37</sup> Iditecibece onigidatiniwace, idiaaḡeledi oyociwigi natecoḡotedi, iditecibece odineetiogi oyatitigi nawikodico, idiaaḡeledi onigodi oyatitigi nodajo-ocaḡataḡa. Idiaanaḡadiite, odinixotinigi lamodi waxacoco, codaa me waxigida. Madewetedipi, codaa oiatetibeci, oyametibigo. <sup>38</sup> Idiaanaḡadiite wetice inoa nigotadi minoataḡa nipodaḡa ane yadilo ane diḡicata niḡeladimigipi, minoataḡa wetiadi, codaa modigeladetigilo niḡinoa lawimaḡajetedi-wetiadi, codaa me niḡinoa becoli catinedi iḡo. Aḡele niḡijo oko diḡidioka limedi me newiḡa liwigotigi niḡina oko anida aneeteḡe niḡina iḡo, igaataḡa daḡaxa meletibigiwaji, aliciagi niḡina oko anida aneeteḡe niḡina iḡo.

<sup>39</sup> Iditawece niḡidi oko owo Aneotedoḡoji meliodi me ninitedibece leegodi monakato. Pida anoḡodibateḡe niḡica Aneotedoḡoji ane ligegi me yajigotediogi. <sup>40</sup> Leeditibige monibeoteḡe niḡica naḡajegi, igaataḡa Aneotedoḡoji lowoogo me najigotedoḡowa niḡica ḡonaḡajegi ane daḡaxa mele, odaa jaḡaga yajigotediogi idiaaḡidi niḡidi laḡajegi yawanaḡaditedoḡoji me yajigotediogi.

## 12

*Aneotedoḡoji Godiodi*

<sup>1</sup> Enice micataga daga idi eliodi oko anetigodiwi, nigijo baanoḡoikee monakato Aneotedoḡoji, ḡodiciagi nigina nalokodeḡecajo. Odaa leeḡodi meliodi anetigodiwi, jikanagaticoace inoatawece niginoa anetigodibeyacaḡadi, codaa minoatawece ḡobeyaceḡeco anetigodigoetini, odaa jaḡa ḡodoniciwaga me jalokodaḡaticogi odoe, codaa me idinatiḡatalo inoatawece ame ḡodawikodico. <sup>2</sup> Iniga jalokodaga, idioka limedi me jiwinagatalo Jesus aneote me jakataga me ḡodewigatace, odaa icota me ḡodicooḡetacedini icaagica nige naga ḡodeleo, leeḡodi me jinakatonaga. Igaataga Jesus akaa yowoḡodi nigidiaagidi meliodi me ninitedibece. Joanigidaa leeḡodi me dinatiteta nigijoa lawikodico, codaa me dinatiteta niboliga nigijo naga yeletedeloco nicenaganagate. Natigide ja nicote liwai libaagadi aca nibaanco ḡoneḡe aneite Aneotedoḡoji me nicotedi.

<sup>3</sup> Amina beḡele mowoo. Ijaagijoa Goniotagodi, eliodi me dawikode codaa dinatite ijoatawece ane beyagi anowotema nigijoa abeyacaḡaga. Joanigidaagee nigowootibige Goniotagodi, odaa aḡanigaaxetiwaji migetaga adinibadaani.

<sup>4</sup> Nigina makapeteḡetiwaji ane beyagi, anigica daḡanadooḡoti ḡadawodi, digo mijoataga Jesus me nadooḡodi lawodi. <sup>5</sup> Pida ḡadaagititece nigijoa lotaga Aneotedoḡoji anowo ḡadoniciwaga, nigijo neḡetedaḡawatiwaji makaami lionigipi. Mee, "Tonigi,

atacolitece nigina Goniotagodi Aneotedoḡoji me ḡadiloikatiti.

Jinaga adinajicitini nigina me diojotedaḡadici.

6 Igaataga Goniotagodi Aneotedoꝑoji diojotetece niḡina lemaanigipi, codaa me iloikatidi inatawece niḡina ane di-batetege me lionigipi.”

7 Adinatiitalo ḡadawikodico micataḡa nionigi niḡina eliodi me iloikatidi. Igaataḡa niḡina mawikodee Aneotedoꝑoji idigotedaḡawatiwaji micataḡa makaami lionigipi. Aḡica ini nionigi ane doḡodiojotece eliododipi. 8 Aneotedoꝑoji diojotetece inatawece lionigipi. Akaami nige daḡa diojotedaḡadici, odaa amewi makaami lionigi, pida dicakaami elinigi. 9 Niḡina ḡodiododipi metiḡodalake leeḡodi niḡina ane beyaḡi ane jaoga, odaa niḡida moko jeemiteeḡatibige ḡodiododipi. Pida daḡaxatace me leeditibige mejiwaḡataḡa ḡodiodi ane ideite ditibigimedi ane iḡe niḡinoa niwicidi, odaa jiḡidaaḡele mejinaḡa me ḡodewiḡa. 10 Onateciḡidiwa nicaaḡape niḡina ḡodiododipi modiojotoḡodici niḡica anoyemaa modigotoḡowa anoyakadi meletogodomi. Pida Aneotedoꝑoji baḡa diojotedoḡodici niḡina meletogodomi eotedibige me idejinaḡa digo mijoataḡa me diḡicata libatiigi. 11 Niḡina me diojotedoḡodici, ica ina daḡa beyaḡitogodomi, aḡeo me ḡodinitibece. Pida nigidiaaḡidi, niḡijo Aneotedoꝑoji ane diojotetece icota moyakadi lewiḡa ane iḡenaḡa, codaa meote laaleḡena mele.

### *Notaḡa anetiḡodiladee*

12-13 Enice awii mabo ḡadaaleḡena, codaa jinaḡadinopootiwaji leeḡotedi niḡinoa ḡadawikodico, micataḡa niḡina oko me dinigaaxe, ane dinigaaxe libaḡatedi, codaa me

naḡamalaga lokotidi. Odaa jigidaagee maxawani niḡina oko ane degeliodi eliwaḡatakanegegi. Niḡidi oko liciagi niḡina oko alejaado. Pida nigodiotagaadicitiwaji me iwitece naigi ane iḡenaga, Odaa aḡalee wayoditibigiwaji, pida jeḡele mewaligitibigiwaji.

<sup>14</sup> Oleetibige me ḡadewiki me daḡakapetege migetaga adinotigimadenitege eledi oko, codaa adinoniciwagaatitiwaji me atamitege inoatawece ane beyagi, odaa ḡadewikitema iniokiniwateda Aneotedoḡoji. Niḡina oko ane daḡa dinatamaḡateetege ane beyagi ayakadi me nadi Goniotaḡodi Aneotedoḡoji. <sup>15</sup> Adinowetitiwaji me diḡica oko ane daḡadiaa yemaa Aneotedoḡoji meote aneletema. Codaa adinoweti adiḡicoa ane liciagi naḡana nawodigije ane bayodi, ane ili, oditaga jeḡeo eliodi oko me neelotikanaga leeḡodi niweneeno. Oditaga niḡidi oko joḡowo eliodi oko mowo libeyacegegi. <sup>16</sup> Codaa adinowetitiwaji adiḡicoa ane loomatewa ane daḡa lodawateda, oditaga aḡalee deemitetibige Aneotedoḡoji ane yemaa, mijotaga Esaú aneo niḡijo jotigide. Esaú iikoetege onidateci ḡinogo niweenigi niḡijoa ane domaḡa dibatege, leeḡodi modoejegi nionigi me domaḡa dibatege, niḡicoa ane nepilidi eliodi, diḡicota me yeleo eliodi. <sup>17</sup> Owoḡotitiwaji me domaḡa yemaa diḡidiaaḡidi daḡa dibatege mijotaga eliodi niḡicoa ane nepilidi mijo modoejegi me nionigi. Pida ayakadi igaataga aḡica nimaweneḡegi daḡa iigi niḡica baanaḡa igo, idaaḡee me domaḡa doletibige ica nimaweneḡegi, codaa anoetibece.

<sup>18</sup> Niḡijo niḡicootalo Aneotedoḡoji, niḡida



makaamitiwaji aḡanagi anipecita ganigetigidi anakati mabaatelo, mijotaḡa loiigi Israel menagitibeci. Otota neḡepaa maditaḡa wetiḡa anodita Sinai. Onica noledi ane noditicogi naḡajo wetiḡa, nexogoteloco codaa eliodi me nexocaḡa, codaa me diwocotaka. <sup>19</sup> Odaa jonogowajipata ica layaageḡegi aca goloneeta icaḡica nigegi. Niḡica noḡowajipatalo Aneotedoḡoji me dotaḡa, odaa joḡodipokota me notokotedini. <sup>20</sup> Odipokotalo me notokotedini leeḡodi aḡaleeḡoyakadi doḡodinaita niḡica liiḡenatakanegegi Niḡijoa ane dotaḡa, neḡee, “Codaa me eijeegagi, nige iḡotege naḡani wetiḡa, leeditibige monigidatice nigepaa yeleo.” <sup>21</sup> Niḡijo anonadi eliodi me doitiḡiwaji, codaa mee Moisés, “Jawigice me idoi.”

<sup>22</sup> Pida micataḡa diḡicootatiwaji deḡepaa maditaḡa wetiḡa anodita Sião, codaa nigepaa manitaḡa nigotaḡa Aneotedoḡoji, Niḡijoa ewikegi. Codaa micataḡa diḡicootatiwaji neḡepaa naḡaca nigotaḡa digoida ditibigimedi, ane liboonagadi Jerusalém, onidiwa icoa anige liwokodi miili aanjotedi, yatecogo me naloogo. <sup>23</sup> Odaa akaamitiwaji jḡicoota aneite Aneotedoḡoji lionigipi liidadi me yatecogo me naloogo. Niḡidi lionigipi idiwa liboonagatedi diniditedini digoida ditibigimedi. Akaamitiwaji aatalo Aneotedoḡoji ane iwi anigoteta inatawece oko, codaa managi neḡepaa aneite niḡijoa liwicidi niḡijo oko ane iḡenaḡatibigiwaji, Aneotedoḡoji aneote me diḡicata libatiigi. <sup>24</sup> Odaa jaḡanagitiwaji miniwataḡa Jesus, Niḡijoa aneote gela anigotedaḡawa me dinilakidetedaḡagi

Aneotedoꝑoji, codaa me ilaagaꝑaditedice lawodi. Niꝑijo naꝑa nadooꝑodi lawodi, odaa ja noꝑatedice moko nilaagedi, odaa jeꝑeote niꝑica ane daꝑaxa mele, pida baadaꝑa liciagiteda Caim me nadooꝑodi lawodi Abel, odaa ja nilaagedi.

<sup>25</sup> Enice adinowetitiwaji me doꝑowocetege majipaata Niꝑijo ane ꝑadotaganegeni digoida ditibigimedi. Niꝑijo jotigide, niꝑijo anodowocetege mowajipata latematigo Aneotedoꝑoji ane yeloꝑodi digoina iꝑo, aꝑoiwokotibigiwaji, pida Aneotedoꝑoji iloikatidi. Nige doꝑoiwoko niꝑijo oko, oko eledi aꝑica ꝑonimaweneꝑegi daꝑa ꝑodiwoko nige daꝑa jibaꝑatege Aneotedoꝑoji lotaꝑa ane icoꝑotedibigimece ditibigimedi. <sup>26</sup> Niꝑijo jotigide ica layaageꝑegi eo me datalale iꝑo. Pida natigide eote ligegi, mee, “Jaotace odanigidatece natalalaꝑa, pida aꝑinokina iꝑo me datalale, codaa me ditibigimedi datalale.” <sup>27</sup> Niꝑina mee, “Jaotace odanigidatece”, nikeetedoꝑowa me itineꝑe codaa me ilatike niꝑinoa ane liidaꝑataꝑegi codaa me jakataꝑa me jinataꝑa, eotedibige niꝑina ane daꝑa ditineꝑe me yakadi midioka limedi me iteloco anei.

<sup>28</sup> Enice, ja jinataꝑa me jibaꝑatege niꝑica inioxigi ane digicata ane yakadi me igike, iniotagodeeꝑatalo Aneotedoꝑoji, codaa me joꝑeeꝑatalo niꝑica anodaa yemaateda, codaa me jeemiteeꝑatibige, codaa idoiꝑatalo niꝑina me joꝑeeꝑatalo. <sup>29</sup> Igaataꝑa Gonoenꝑodi liciagi niꝑina noledi ane yalegi inoatawece.

# 13

## *Anodaagee me jocaḡanaḡatalo Aneotedoḡoji*

<sup>1</sup> Oleetibigetiwaji midioka limedi madinemaan-itiwage, igaataḡa akaami dinioxomigipi. <sup>2</sup> Inigica daaditaḡa amedegeni niḡina anoyiwaḡadi Goniotaḡodi ane diḡica me ḡadowooḡotaḡipi niḡina mototaḡawa, igaataḡa jiḡijo oko anoimedeeḡe aanjotedi, pida aḡica doḡoyowoḡodi me aanjotedi. <sup>3</sup> Idioka limedi manalakitibigetiwaji maxawani niḡina anoyiwaḡadi Goniotaḡodi ane niwilogojedi, micataḡa daḡakaami eledi ḡaniwilagaḡawepodi. Eleditace oleetibige midioka limedi manalakitibige niḡina ane nawikodeeḡa leeḡodi eliwaḡatakaneeḡeḡi micataḡa daḡakaami eleditetiwaji ḡadawikodaḡawepodi.

<sup>4</sup> Idatawece leeditibige me jeemiteeḡatibige niḡina oko ane wadonadipi. Niḡinoa ḡoneleegiḡadi, iwaalepodi wadonadi, leeditibige me loomatewa inokina ane lodawa. Igaataḡa Aneotedoḡoji iwi anigoteta codaa me iloikatidi niḡina oko ane loomatewa ane daḡa lodawa.

<sup>5</sup> Jineḡewianaḡa emaani dinyeelo, pida aniniitibecitiwaji leeḡodi niḡica anidi makaamitaḡa, igaataḡa mee Aneotedoḡoji, “Aḡica daḡa ḡadikanitice, oteḡexaḡaga ḡadalatitiwaji.”

<sup>6</sup> Odaa jakataḡa me daḡa jawienatakanaga, codaa mabo ḡodaaleḡena, mejinaḡa,  
 “Iniotaḡodi Aneotedoḡoji Jiḡiniaa ane idaxawa,  
 codaa aḡica ane idoita,  
 igaataḡa niḡina oko aḡica loniciwaḡatiloḡo deḡeo  
 ane beyagitomi.”

7 Analakitibigetiwaji nigijoa odoejedi gadacilodi anoyelogoditedagawa Aneotedojoji lotaga. Digowootiwaji nigica anodaagee midioka limedi monakato Goniotagodi negepaagicota me nigo. Akaamitiwaji anakatoni Goniotagodi, digo mijotaga monakato. 8 Igaataga Jesus Cristo adiniigi. Eginiaaginiwateda jotigide, ina noko, codaa midioka limedi nigijo anee, nigepaa ganigicatibige. 9 Enice jinaga domigikani inoa eletidi niigaxinaganegeco iomagaga degetigadadeegiticogi wetice nigijo naigi anewi, niigaxinaganegeco anodakapetege godiigaxinaganegeco. Ele nigina godiwigo me yeligo nigicoa anele Aneotedojoji anidioka limedi me godediatetece, idigida ayeligo nigicoa niigenatakanegeco anoditece niweenaga. Igaataga niginoa niigenatakanegeco anoditece niweenaga agoyaxawa oko anodoletibige moyotete niigenatakanegeco anowo me ili eliwaगतakanegegi.

10 Icoa nisacerdotitedi judeutedi anodibatigi Aneotedojoji ligeladi oyeligo nigijoa eijedi anonigodi, odaa jogoyajigotalo Aneotedojoji. Pida baadogoyakadi moyeligo Nigijoa ane yeletedogodomi maditaga nameeja Aneotedojoji, nigijo ane jelicaaga. 11 Nigica lacilo-sacerdotitedi judeutedi yadeegi eijedi lawodi catiwedi nigica le Aneotedojoji ligeladi anoiomagaditema iniokiniwateda Aneotedojoji, igo me yajigotalo Aneotedojoji lawodi leegetedi nibeyacegoco. Pida nigijoa eijedi anonigodi бага oyadeegitedicogi we nigotaga, odaagoyalegiteda.

<sup>12</sup> Joaniḡidaa leeḡodi Jesus maḡaḡa yeleo wetice ica lapoagi-nelegi nigotaḡa, eotedibige me yakadi me ibake epaa lawodi me napitaḡadi libeyaceḡeco noiigi. <sup>13</sup> Enice iniḡa miniwataḡa Jesus, micataḡa daḡa wetice nigotaḡa, codaa idinatiḡata niboliḡa digo mijoataḡa me dawikodetetema niboliḡa, niḡijo loiigi noḡonietedibige odaa joḡoyeloadi micataḡa daḡa ḡonematagodi. <sup>14</sup> Igaataḡa niḡina iḡo aḡaca ḡonigotaḡa anidioka limedi mani, pida inibeonaḡateḡe ḡonigotaḡa anicota me ḡonebi ganigida noko.

<sup>15</sup> Enice idioka limedi me jajicaḡatalo Aneotedoḡoji ḡoboonigitalo, ḡoboonigi me joḡeeḡatalo. Jesus yajigote ḡoboonigi Aneotedoḡoji. Niḡina me jibakenaḡa ḡonioladi me iniotagodeeḡatalo, me joḡeeḡata Liboonagadi.

<sup>16</sup> Jiniḡikani mawii anele codaa mawalaceni niḡicoa ane ḡanepilidi adinaxawanitiwage, iḡaataḡa niḡina me jaḡa niḡida anejinaḡa, micataḡa daḡa jaḡa noḡeedi Aneotedoḡoji niḡina aneliodi me yema.

<sup>17</sup> Iwaḡati niḡinoa ḡadacilodi codaa mawii niḡica ane liḡenatakaneeḡeḡi. Igaataḡa idioka limedi modoweditelogo ḡadiwicidi, codaa moilakidetedini naalewe miniwataḡa Aneotedoḡoji, niḡica ane libakedi. Nige iwaḡati, odaa ninitibigiwaji niḡina me nibaḡa. Pida nige daḡa iwaḡati odaa aḡeḡaḡalodipi codaa libakedi aḡadaxawanitiwaji.

<sup>18</sup> Oleetibige midioka limedi motaḡaneeḡeni Aneotedoḡoji mipokitoḡoloco midioka limedi me jaḡa ane iḡenaḡa. Ajawienatakanaga me

daḡa jeemiteegatece moko nilaagedi catiwedi ḡodaalegenali. Odaa inoatawece ane jaogate jemaanaḡa me jaoga niḡina ane iḡenaḡa. <sup>19</sup> Pida jipokotaḡawatiwaji mepaanaga otaḡanegeni Aneotedoḡoji amaleeḡaḡa idimonyatace makaamitaḡa me diḡica ane jopaḡadi.

### *Jotaḡanegenaga Aneotedoḡoji*

<sup>20</sup> Aneotedoḡoji Jiḡiniaaḡiniwa aneote ḡodaalegena mele. Eote Goniotaḡodi Jesus me yewiḡatace leeḡodi me nadooḡodi lawodi, odaa jiḡidaaḡee neḡeote ḡela anigote me dinilakideteteḡe Aneotedoḡoji inaa oko. Jesus liciagi niḡina nelegi nowienoḡodi waxacocoli (leeḡodi me doweditedeloco loiḡi). <sup>21</sup> Joaniḡidaa leeḡodi me jemaanaḡa Aneotedoḡoji me yajigotedaḡawatiwaji inoatawece anele anopootibige mawii niḡica ane yemaa. Codaa jemaanaḡa me ibake loniciwaga Jesus Cristo meote catiwedi ḡadaalegenali inoatawece anodocaḡatibigo. Odaa jiḡidaaḡee midioka limedi me joḡeeḡatalo Cristo. Amém.

### *Owidijedi notaḡa*

<sup>22</sup> Inioxoadipi, jipokotaḡawatiwaji niḡina majipaatalo niḡinoa yotaḡa, anejitece me ḡadoniciwagati. Mabaateḡe codaa madinatiitalo yotaḡa, iḡaataga naḡadi iwakate ane jiditibigaḡaji aḡocaḡataḡa. <sup>23</sup> Jemaa mowoḡotitiwaji ḡonioxoa Timóteo naḡa noditice me diniwilo. Nige age menotiwa, odaa jadeegi, ixigaḡawa nigejigo makaamitaḡatiwaji.

<sup>24</sup> Idecoaditibige iditawece ane lacilodi Aneotedoḡoji loiḡi, codaa miditawece Goniotaḡodi

loiigi digoida makaamitaḡatiwaji. Gonioxoadipitigi Itália eledi oyecoaditibigagaji.

<sup>25</sup> Jemaanaga Aneotedogoji midioka limedi meletedaḡadomitiwaji. Odaa jigidaagee. (Amém.)

## **Gela Liwai Lotaganaḡaxi Aneotedoḡoji New Testament in Kadiwéu (BR:kbc:Kadiwéu)**

copyright © 2012 Wycliffe Bible Translators, Inc.

Language: Kadiwéu

Translation by: Wycliffe Bible Translators, Inc.

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Kadiwéu

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---



PDF generated using Haiola and XeLaTeX on 21 Feb 2024 from source files  
dated 29 Jan 2022  
7128a549-e957-5460-8c56-0f5281edf264